

ASO LUA, 14 MATI 2023

Na nofoia e le Fofoga Fetalai le Nofoa i le itula e 9:29 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

E faatalofa atu i le paia o le Palemene i lenei taeao fou faapea foi le alafā o le tatou Maota nei. O paia lava e le tau tapue'ina, o mamalu foi e le avea, o le paati e le solo i se gagana a le Fofoga Fetalai. Nuunuu atu ia. A o le agaga o le loto faafetai ae i le Atua ona o Lona agalelei ma Lana faamalologa i lo outou soifua ma so matou malosi, lea ua tatou oaoa ai nei i Faleseu, ua maua le soifua manuia i lo outou lagi e mama mo le faaauauina o le tatou galuega. Ia, malo le usu i lenei taeao.

E i ai foi le talitonuga o lo o manuia le faafofoga tapuai mai a le atunuu i ona paia faalagia. E tele le tatou galuega o lo o tau faamaea, ae tatou faamoemoe pea i le fesoasoani mai o le agaga o le Alii o le a faapena ona faataunuuina ai nisi o tatou feau o lo o totoe.

Agalelei le Atua i le usugafono a le tatou Palemene i lenei taeao, manuia foi le tapuai mai a si o tatou atunuu.

ILOILOGA O LIPOTI A KOMITI FAA-PALEMENE MA TALI A LE MALO

P.P.2022/2023 NU.35 LIPOTI A LE KOMITI O LE VAEGA TAU LE VA FEALOAI I LE P.P.2020/2021 NU.63, LIPOTI FAALETAUSAGA A LE FAALAPOTOPOTOGA FAAVAE TAU FATUGAO A SAMOA MO LE TAUSAGA FAALETUPE 2019/2020

P.P.2022/2023 NU.83, TALI A LE MALO I LE P.P 2022/2023 NU.35, LIPOTI A LE KOMITI O LE VAEGA TAU LE VA FEALOAI I LE P.P.2020/2021 NU.63, LIPOTI FAALETAUSAGA A LE FAALAPOTOPOTOGA FAAVAE TAU FATUGAO A SAMOA MO LE TAUSAGA FAALETUPE 2019/2020 - ILOILOGA

FOFOGA FETALAI: E tolopo taulumaga a le Fono Aoao i le aso ananafi ua maea le saunoaga a le Afioga i le sui usufono mo Aleipata Itupa i Luga e tusa o felafolafoaiga i le Lipoti a le Komiti ma Tali a le Malo i le Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2019/2020.

Ia, o le avanoa leni mo se tasi o sui usufono e fia saunoa i le Lipoti. Ia, o lea ua maitau atu o lea ua fou mai le sa o le sui usufono mo Salega 1. Tulai mai le sui usufono mamalu.

Afioga FEPULEAI FAASAVALU FAIMATA SU'A (Salega 1): Faafetai mo le avanoa. E muamua ona faatalofa atu i lau Afioga i le Fofoga Fetalai, o lea ua e faatama mua i leni taeao e momoli foi lapalapa o malo ma taulaga le viiga o le faafetai i le Atua aua ua suluia eleelesa o Samoa i le malamalama o le aso fou i le agalelei ma le alofa le mavae o le Atua ia Samoa aemaise o lana faigamalo, ia ma le loaloa o Samoa o tapuaia tiute ma faiva ma feau o leni aso.

E faatalofa atu i lau Afioga i le Fofoga Fetalai ma le Matagaluega i lau Susuga i le Failautusi o le Fono Faitulafono.

E faatalofa atu foi i lau Afioga i le Sui Palemia le ua taitaia le Malo i leni foi vaitau ma leni taimi, ia ma lau Kapeneta.

E faatalofa atu foi i lau Afioga i le Taitai o le Itu Agai ma sui usufono uma o lena Itu o le Maota.

E le faagaloina foi le tapuaiga a Samoa aua le susu mai o taulaga soifua, aemaise o tamalii ma failauga, o Tapaau o Samoa ua potopoto i leni aso e talosia faiva.

E faatalofa atu foi i le Afioga i le Loia Sili ma le Suetusi Sili aemaise o Ofisa Sili o Pulega o Matagaluega taitasi a le Malo, aemaise foi o le tapuaiga a le aufaigaluega tofoti a le Atua i so o se fatafaitaulaga ma so o se vaieli i Ekalesia o lo o faanonomanu ma tatalo mo tatou faiva ma tiute.

E talosia foi le usugafono a le Tamaitai Palemia ma nisi o Minisita, talosia foi gasegase o feagai ma nisi o sui usufono, o Taitai o le atunuu ma e ua le mafai ona tatou usufono faatasi i leni aso ona o tuatuagia ma tuatuno'a faale-itumalo ma faale-Malo.

Ae ua tulai leni usugafono i lau Afioga i le Fofoga Fetalai e fai foi se sao o leni itumalo e tusa ma le Lipoti matagofie ua i luma o le Laulau a Fono. E momoli le agaga faafetai a leni usugafono i lau Afioga i le Taitaifono. E faitau atu foi i le Lipoti i le aso ananafi ma fautuaga, o se Lipoti ua lava tapena ma sailiili ma mafatotoga i ona itu uma. Ae ou te fia agai i fautuaga. O le Fautuaga 1 ma le Fautuaga Lona 2, e pei e foliga e lilifa agai i le faigamalo. Ae ou te faatauaina le Fautuaga Lona 3. O lo o faapea mai le Fautuaga Lona 3; ina ia togafitia faapitoa e ala i fomai ma masini. Ina ia fautuaina le Komiti a le Malo ia silasila i ni auala e faamalosia ai taitai o

nuu, afioaga, Ekalesia, matua. Ia o lona uiga o le pitolaau a le sui usufono ma lona itumalo lea e agai i ai.

Ou te tulai e faaleo le agaga faafetai a lou itumalo i lau Afioga i le Minisita mo Tina ma Tamaitai lau Afioga Leota, ona e matau e le i afea lava e se saunoaga i le aso ananafi, sa i ai le polokalame a le Matagaluega o Tina ma Tamaitai na tufa atu ai i tua le tai \$10,000 ma faamalosia ai le vaega lea o le faamalositino. O le auau o lenei faamoemoe, ina ia faaitiitia faamai le pipisi, e ala i le suka, o le toto maualuga ma fatugao, se i tulou. Faafetai i lau Afioga i le Minisita, ae maumau pe ana faalua i le tausaga ona avatu. O lou itumalo toetiiti lata i le 100 masini foi ia e vili ai le fruits ma tipoti uila tulou, na ou sau faatau atu i le SSAB, e fai ai faailoga a tama ma tina matutua ma tupulaga. Ae na sasalu mai le itumalo o ni faailoga tupe, ae ou alu tufa i ai mea ia. O le faamalosiga lena ina ia mafai ona taumamafa i meaai paleni, pei o le... e mafai ona avatu le moli o le apu tuu i totonu ona vili lea ae taumafa, e faamalosia ai le taumamafa o sui o le itumalo ma lota nuu i meaai paleni, pei o fruits ia e saunoa mai i ai le Afioga i le Minisita o le Soifua Maloloina. O le agaga lena ma le faafetai o lo o faapea ona fesoasoani mai le Matagaluega o Tina ma Tamaitai i le isi vaega o le Soifua Maloloina ma le Matagaluega o Aoga.

Ae o le talosaga i le vaega 3 lea, lau Afioga i le Taitaifono ma le Minisita, pe mafai ona toe faaopoopo nisi fesoasoani i tua i nuu ma itumalo, aua o le mea lea e i ai, ia na o le o atu lava fai aoaoga, gata loa i ina. E le mafai e aoaoga ia ona faaauau. Ua maua i le saunoaga a le Minisita o Aoga ananafi o le masini sili lava ona taua o le toe fafagu i luga o mea ia po o meaai paleni. Aua a aumai masini faamamatoto o le fatugao, e toe alu le tupe e maintain ai pe service ai. A o le masini lea na maua ananafi, o le faamalosia, ae o le service ina la po o le tausiga o le mea lea, e i ai le upu faa-Samoa faapea, o le faaauau. O le fili lava o le masini lea, o le faaauau, aua na o sina taimi lava e fai ai ona muta loa lea ua le mafai ona faaauauina. O lona uiga, e tatau ia tatou le mamalu o le tatou usugafono ma le Maota Fono ona faamalosia ma faaauau aua e le mafai ona faamalosia na o sina vaitaimi faavaitaimi. Ae a faamalosia ma faaauau, o lea ua tatalo mai le Taitaifono ma le Minisita, i faiganuu, ekalesia, faalapotopotoga, matou te talia, e talia e lou itumalo. Ae o le tatalo e manaia la pe a faalua atu ia le vaega lea na fai e Tina ma Tamaitai e faamalosia ai le vaega lea. Aua o le manaia lava o le fai o polokalame, ma sina foi lea e pei o faailoga ia, e uma ona ave le masini e vili ai le fualaa, ae avatu loa ma nai fatu laau e toto, e faamalosia ai le faia o atinae.

O le tulaga tau taumafa paleni, o le manaia ia o le mea lea e i ai o le faia o taumafa o le lalolagi, e fai ai le aso faapitoa faapea. E fai le aso faapitoa o taumafa Samoa, e manaia. Ae manaia foi pe a fai se aso tatou te faamanatuina i vaiaso taitasi, taofi uma ai meaai tuuaisea, ae faamalosia i totonu o faleaiga o totonu i aiga ma le tatou fale Fono, aua le toe taumafaina

se aano o manu fasi ma isi mea, ae ua lava a ia ma fualaau aina. Ae pe manaia la le Aso Gafua, aua o le Aso Sa e pei e fai sina mamafa tele o le taumafataga, ae tuu mai loa le Aso Gafua, ia outou taumamafa ma tatou aai uma i tulaga o meaai mama, meaai paleni, ona mafai lea ona tau faaauau aua e fai fai lava masani, faapea lea, e aua le toe aumaia ni tatou manifasi, ae ua lava le ia ma fruits ia e faatau.

O le isi vaega o le fautuaga i lau afioga i le Taitaifono, toe faamalosia le Ofisa o Aoga, aua e pei ona saunoa le Minisita o Aoga ua tele lava le saimini mata lea ua vaaia i tua i aoga. O le tatalo, ua matua tele lava ulo saimini lea ou te vaai ai au i tua. O le fesili, e i ai se afaina o le bowl saimini, i alo ma fanau, ma le taimi atoa ma afaina o outou alo ma fanau, taofi le faatauina o lole ia e avatu i totonu o faleaoga? O se vaega lena o le tuualalo a lenei usugafono, e talia aloaia ai le lipoti a le Komiti ma tali a le Malo e tauala mai i le afioga i le Minisita o Soifua Maloloina. Ia manuia faiva ma tiute, feau o lenei aso faafetai.

FOFOGA FETALAI: Ia malo faafetai i le saunoaga a le sui usufono mamalu o Salega 1 mo fautuaga e tusa o le tatou lipoti aua lava le soifua maloloina o le tatou atunuu, malo saunoa faafetai. Ia tulai mai lau afioga i le Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO (Taitai o le Itu Agai): Faafetai i lau afioga i le Fofoga Fetalai. E tulai atu foi e fia fai ni nai manatu ia pupuu e tusa ma lenei lipoti, aua matau lava i le aso ananafi ma le totoa, i finagalo faaalua e ese le matagofie, e fiafia lava e faalogologo atu. O le mea lava e muamua e aumai pea le faatau o le prevention, ia aua ne i aafia i le mea lea o le afaina o fatugao, e oo ina ono manaomia ai le famamaina o le toto. O lona uiga, e pei o le feau lea e aumai i le lipoti faaletausaga lenei, i saunoaga a le afioga i le Minisita faafetai mo le saunoaga matagofie, faapea foi le Taitaifono ma le Komiti. O le falemai lenei ma le masini ma nofoa, treatment, e le o se cure. E le o se cure le tulaga lenei, o lona uiga e faatauina le prevention, o lea e malie lava i le faalogo atu i le aso ananafi, ma lenei foi taeao i saunoaga matagofie, ave lava le faamuamua i le prevention, taumafa ma tulaga faapena, o le a le toe agai tele i ai sau faamatalaga i na vaega. Ae pei o le tulaga taua lena, matauina e lou sui usufono e tusa ma lenei lipoti.

O nai faamaumauga taua ia o le tausaga faaletupe e pei ona aumai, e 219 tagata o Samoa sa tuuina atu i ai le auunaga faamama toto i totonu o lenei tausaga faaletupe. E mai i lea fuainumera e 19 ua maliliu, 7 ua faamaamulu ma le 15 o isi tulaga. E pei o le vaega taua lea e pei ona malie i le faalogologo atu, e le o se treatment, po o se togafitiga po o se auunaga e faifai pea ma soifua ai lava seia oo lava pe fia le tele o ni tausaga. O le tualga lea e pei e

na o se faaopoopoga o nai tausaga o le soifua, aua foi la nisi galuega taua o lo o manaomia e faaoga i ai le soifua i le lalolagi nei. Ae o tulaga ia e pei ona matau, o lea faafetai, o lea ua taua ua maea le tatou fale fou, lea ei uta i Motootua ua sii i ai le falemai faamama toto, ona sa fai lava si laititi ma vaapiapi o le falemai tuai lea sa i ai, e pei o i i lalo i le vaega lea na fai ma nofoaga o tamaitai tausaga soifua. Ia o lea la ua sii i luga, e momoli atu ai le faafetai i lau afioga i le Minisita. O lea la ua maea Motootua ma Upolu, ae o le a se fuafuaga mo Tuasivi? Aua o lea e matau atu o lo o manaomia foi le faaleleia o le tatou falemai i Tuasivi? E faapea foi i nofoa po o masini, o lo o manaomia pe au i ai lau faasoa i le 30, aua o lea ua tau i ai le tolusefulu i nofo ia po o masini ia ua tau o le a taunuu mai. A o i ai i i, i le vaega lea lau afioga, pe oo atu le faasoa i isi falemai faaitumalo, e pei foi ona saunoa nisi o sui usufono. O i lava ia matou ia i Atua, e pei ona silafia e lau afioga, o le falemai i Lufilufi, o Lalomanu o Poutasi. E pei o falemai na faaitumalo tetele o lo o i ai i le taimi nei. Afai e au i ai lau faasoa, ua faafetai, aua o mea foi faapea e fuafua lava i gasegase o i lea vaega o le atunuu. A o le taua i le matou faleatua, ona e pei ona silafia, i taimi o le louloua o le tau, e tele ina papa vaitafe faapea foi i le Anoamaa, e solo ia tafaala, ona poloka ai lea o feoaiga. E lelei le i ai o masini po o nofoa i isi falemai na, ia mafai ona faaoga e i latou o lo o aafia i ia foi ituaiga treatment i le tulaga lea.

Lau afioga i le Minisita o le Soifua Maloloina, pe i ou te matau atu i le lipoti leni, e le o i ai se tatou fomai tipitipi faapitoa mo tulaga ia manaomia. O lea ou te matau atu e pei e toalua ni tamalii papalagi e malaga mai fafo faavaitaimi e omai e fai taotoga ia e tuu ai laina i tino o tagata o lo o manaomia aua le faaogaina i masini. O lea e i ai le tatou fomai, le susuga ia Leituala Dr Ben Matalavea, e pei o ia lena o lo o galue i le taimi nei, ae e pei e matau atu i le lipoti e pei o ni laina foi ia e le tumau. O le a se fuafuaga o i ai, po o i ai se alo o le atunuu o lo o ave i fafo e aoao ma fai ana aoga faapitoa i ia ituaiga fomai. Aua o lea e matau atu e manaomia tele e tatou. E faapena foi i tamaitai tausaga soifua o lo o galulue i totonu o le tatou falemai lea o fatugao, aua e pei e tau ese laititi foi le faatinoina o latou matafaioi. O vaega ia lau afioga i le Fofoga Fetalai ma le Minisita, o lea foi e faafofoga mai le Taitaifono a le Komiti, e pei o nai vaega ia ua ou manatu au e tataua ona faaleo, ae o lea ou te manatua lau afioga, sa fai ma omai sui o le falemai lea i le tatou maota lea i tua, e fai siaki a sui usufono. E po o le a se finagalo, ona o lea sa saunoa le Minisita o Soifua Maloloina, le taua tele foi o lea vaega, e tataua ona fai ma siaki ia le mamalu foi i afioga i sui usufono o le tatou Maota, ona sa fai foi. Ae a maua foi se isi avanoa, ae ua manaia tele, tatou agai e lelei lava le fai ma siaki, ona fai ai lea o isi fuafuaga aua togafitiga faapenei. E pei o le faaopoopoga lea lau afioga i le Fofoga Fetalai, ia faafetai mo le avanoa i leni taeao.

FOFOGA FETALAI: Ia malo saunoa i lau afioga i le Taitai o le Itu Agai, aemaise foi o nisi o fautuaga taua mo le tatou Faalapotopotoga, o lea foi e faafofoga mai le Minisita faapea le Taitaifono ma le Pulega.

Ia tulai mai le sui usufono mo Lefaga ma Faleaseela.

Afioga MASINALUPE MAKESI MASINALUPE (Lefaga ma Faleaseela): Ia faafetai mo le avanoa i lau afioga i le Fofoga Fetalai. Ia e fia piiama foi e pei ona molia le talosaga i lenei taeao ma faafetai ai le alofa ma le agalelei o lo tatou Tapaau Sili. E momoli foi le faamalo i aofaga potopoto o le Maota i lenei foi taeao. I le afio o le afioga i le Sui Palemia faapea le paia o le Kapeneta aemaise foi o Minisita Lagolago. I lenei foi itu i le afio o lau afioga i le Taitai o le Itu Agai, aemaise o sui usufono uma. O le maave eseese ua tatou aofaga potopoto, i le susuga i le faafeagaiga ma le faletua, faapea Ofisa Sili o Pulega o Matagaluega, le afioga i le Loia Sili, faafetai i lenei taeao ua tatou feiloai i le alofa ma le agalelei o le Atua.

E taumafai atu e fai se sao o lenei itumalo o Lefaga ma Faleaseela aua foi le lipoti taua a le Komiti o lea ua taatia i lumamea. E faaleoina le faafetai i le Taitaifono ma le Komiti, e tusa ai o le taua o le lipoti ua faataatia. E pei e taua maua atu o le auga e pei ona i ai, o le taumafai e foia ma faaitiitia, e le gata i lea, ia puipuia, aemaise lava o lenei faamai ua tele ina aafia ai alo ma fanau, ae le gata i lea o tagata matutua. E i ai sina faitau e tau faaataata ai le manatu i lenei taeao e faapea, aua e te fesili po o le a se mea e fai a lou Malo ia te oe, ae fesili oe po o le a lau mea o fai mo lou Malo. O le agaga o lenei sui usufono e tusa ai o le lipoti, o lea ua tatou agai pea i le... e pei ona saunoa le Minisita o le Soifua Maloloina, faapea le Minisita o Aoga mo ni togafitiga. Ae ou te talitonu au ia, o lea e i ai le fomai a le tagata i le taimi lenei. O le fesili po o ai le fomai? Ia o lea ua tofua telefoni uma le mamalu o le tatou Palemene. A silasila i ai i le telefoni, o le taua ia o le faaaogaina o le internet. Sa ou sailiili i le telefoni ma ou vaavaai pea pe i ai se togafiti e foia ai ia fatugao. O lea lava e faamalamalama lelei mai lava e le telefoni. E 5 lava mea taua e taumafai e foia ia le fatugao, po o le afaina o kidneys. O lea e faamalamalama, o le taeao, po o le po foi ae e te le i tofa, inu sau ipuvai, e faamama ai lou... malamalama foi le taeao, ia faapea foi ona taumafa se ipuvai. A o le mea e sili ona taua lea e tau mai i i, atonu o fomai atamamai ia... o le toaga e ai le grapes, o le vine, e tasi lenei o mea e foia ai ma le tulaga lelei, atoa ma isi mea. Ia e lelei le sutesue pea i ai, o lenei e sau uma lava. E na o le oomi lava o le Google, oomi le You Tube, ona sau atoa lava lea o le faamatalaga. E te le tau alu la e vaai se fomai, o lenei ua sau ai lava i le telefoni. E faafetai foi i le Minisita o Fesootaiga, ae faataugofie le tatou internet.

O le tulaga lenei o lea e i ai i le faagasologa, e malamalama lelei ai, e le tau alu sau tupe... i lo le mea lea e tupu, e sese le faaaogaina o telefoni. Fai ai

fua ia facebook e faaleaga ai fua nisi, ae a faaaoga lelei lava le telefoni e vaai ai po o a mea aoga, o le lelei ia. O le vaiaso ua tuanai, e i ai foi le fonotaga sa ou faasea ai i le telefoni, ae o le taimi lenei ua ou matua lagolagoina lava le telefoni, ina ia faaaoga lelei e foia ai foi lea vaega. E na o se fesoasoani atu e lagolagosua i le mataupu faigata a le Minisita o le Soifua Maloloina mo lenei foi vaitau aemaise o le soifuaga o lo o i ai.

Ia manuia lau afioga i le Fofoga Fetalai, le mamalu o le Maota, manuia lenei aso.

FOFOGA FETALAI: Faafetai foi faasoa mai aua foi le galuega a le telefoni, malo lava. Ae aua foi nei galo, e lelei lava le vaai o le fomai e mautinoa ai mea uma, ae malo mo le faasoa, e fesoasoani foi foi i fautuaga mo le tau tuutiitia o lenei gasegase.

Ia, o lea ua matau atu ua... Oi, se i tulai mai le sui usufono mo Palauli 3.

Tofa LAGAAIA TIATUAU TUFUGA (Palauli 3): Faafetai i lau Afioga i le Fofoga Fetalai. E manatu e le toe tau faailoina le lupe ua mua, o lea ua mua mea i Matautusa ina ua faaifo i tiaava ae mapu i tialogo le lupe sa folau, fitaituga lau Afioga i le Fofoga Fetalai. E talitonu foi e le mataulufotu aua lau saunoaga faafeiloai aemaise o le tatou taulaga i luma o le Atua. E momoli atu ai le faafetai.

E faafeiloai foi i le paia o le Palemene i le aso, aua le usugafono a le Palemene a Samoa, ua savini faapunaomanu ai lagona, ua faatalimaua le atu a le tautai, aua lo outou soifua ma le soifua galue aua Samoa ma sona lumanai, a o se saolotoga, a o se ola fiafia ma le soifua fiafia o ona tagata. E momoli ai le faafetai i luma o le Atua. Ia, leaga o le alofa o le Atua o le moli e muao, e saili manu i ai le lalolagi i Lona pupula ma Lona matagofie, o le galu e faasufiata e to'a i ai le auaumalū, viia le Atua ma Lana faasoa. Fatafata i le fatafata o lana Palemene, vaaia pea lona matagofie.

A o le mataupu o le aso, e ao pea ona avatu i ai se leo. E le tele se manatu, ae taua tele lenei mataupu. A tilotilo ma le toto'a i ai, e foliga mai o le a saosasoa tele le faama'i lea o le famama o le toto. Ua oo lava i tupulaga laiti, o le mea lea ua i ai. O lea lava ua tatou malamalama i ona mafuaaga. Faafetai i le Afioga i le Minisita e aumai pea fautuaga. Ia o le naunau lava, leaga e faaoleole le aalu o le tatupu ma le fugafuga o le pulu o le alofa i le ola. Faafetai i lau Afioga i le Minisita ma le aumai o le mataupu lea, e tasi lava le auga o meataumafa. Ae i ai foi le lagona, e tatau ona taumafai se auala e tau taofiofi ai meaai ia e aumai mai fafo, leaga o la e faaaoga i ai le vailaau. O le ala foi lea ou te fiafia lava foi i le polokalame lea, se i atia'e le tamaoaiga o Samoa e ala i ana ia lava meataumafa, se i tau taofiofi ai faamai eseese ua fai lava si saosasoa, aemaise a tatou fanau iti o lo o i aoaoga, ia e tatau lava ona i ai foi se puipuiga mo latou.

Ae lau Afioga i le Minisita o le Soifua Maloloina, o le talosaga e fia avatu a lou sui usufono aemaise foi lou itumalo o Palauli 3, faamolemole, e tele lava le tatou taulaga i Salelologa, ae a pe a malie le tofa i lau Afioga ae avatu se fale faamamatoto, ua faigata tele. O le isi... leaga e i ai le mea na tupu, e oo atu lava le gasegase i Tuasivi ae ua faigata ona togafiti, fai si mamao. Ae a pe a malie ae avatu se tatou fale i o i Salelologa, e tele le eleele, ma e amata atu ai lava ona faufau atu ai lava ma sololelei ai lava le tatou taulaga i Salelologa, o la ua matagofie lenei taimi.

Ia, na pau lea o le talosaga e avatu i lau Afioga i le alii Minisita o le Soifua Maloloina, e talitonu lava o le a talia e lau Afioga. O lau Afioga foi o taua la e i o e taumafai e faalelei atu le tatou itumalo. Ia, ma le faaaloalo. Agalelei mai le Atua, o a ni faafitauli o le Fono, ia lafo i le auau o fisaga o matagi e i ai le tofa faapaia a le Atua. Lau fioga i le Fofoga Fetalai, ia maua pea lou soifua matagofie, maua le tofa aua le faafoeina o le Palemene a Samoa. Ia agalelei le Atua i lenei aso ma le tatou Fonotaga. Soifua.

FOFOGA FETALAI: Malo faafetai, faafetai foi mo le faasoia ma le fesoasoani mai i le tatou Lipoti aua lava le soifua maloloina o tatou tagata.

Ia se i tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO (Minisita o Tupe): E faatalofa i lau Afioga i le Fofoga Fetalai faapea foi le Afioga i le Sui Palemia ma le saofaiga a le tatou Kapeneta, saofaiga a Minisita, le Taitai o le Itu Agai ae faapea foi le loaloa o le tatou Palemene. Ia, o Ofisa Sili o Pulega o tatou Matagaluega faapea foi tatou au valaaulia ua faapena ona tatou auai i lenei taeao fou. Vii le Atua ua faasopolia mai lo outou soifua ma se ola i lenei foi taeao fou e faaauau ai a tatou galuega ua valaauina ai i tatou.

E taua le mataupu o lo o tatou talanoaina. E maiu lava ma le toto'a ua i ai manaoga o Afioga i sui usufono. Ae ou te maiu ma le toto'a, e le o se ata lelei le toe faatauina o nisi masini. E le o se ata lelei foi mo le tatou atunuu le toe fai o nisi falemai faamamatoto. E tutusa lelei lava ma le falepuipui. Ua tatou vaai i le falepuipui i le taimi lenei, ua faateleina le falepuipui. O le a le ata lena ma le feau o lo o taumolimoli mai? Faatoatele tagata faasolitulafono e o e faatumu ai le falepuipui. E tutusa lelei lava ma le feau lea e taumolimoli i le tatou tatalo pea tatou te o e faatele ni masini, faatu ni falemai faamamatoto. Ae tatau ona tatou tilotilo ma matau po o le a le a'a o le faafitauli. O le a'a o le faafitauli o lo o i ou lava aao faafitauli ma le tali o le faafitauli lenei. O lea ua maitau atu i folasaga ma fetalai, ia o le meatausami. A tatou toe tomanatu i aso ia, matau foi i matua, na oo lava le soifua o tatou matua i le 100+ tausaga, 90+ tausaga. Sa maitau foi ma le toto'a sa tele ina tausami i mea lava e gaosi i o latou lima, e le gata i tatou

lava meatausami masani, ia, o le i'a, o tatou faatoaga. O mea aupito sili ia ona taua na tua i ai o tatou matua i aso ia na le maua ai i ni faamai. Ae a aso nei? O aso nei ua matau, ua tele le tatou faalagolago i meaai mai atunuu i fafo. Atonu o lea ua tatou maitauina, o nisi ia o itu e tatau ona tilotilo i ai le tatou faigamalo, aemaise foi le tatou Maota o le Palemene, po o fea tonu lava o lo o taoto ai le a'a o le faafitauli. O lo o tatou tilotilo foi i le tulaga i le aoaoina o i tatou. Ia e leai se isi siosiomaga e muamua aoaoina mai ai le tagata soifua, o totonu o le aiga, aoaoina matua. Ia mautinoa o a meataumafa e tatau ona faatino ma tapena i totonu o le lotoifale faaleaiga, aemaise alo ma fanau.

Sa matou auai i le fonotaga lea i Fiti, le Early Childhood Education, sa faatino ai e nisi o alo ma fanau laiti tai 2 tausaga le latou message ma le feau taumolimoli mai i Taitai uma o le Pasefika sa matou auai. Fai mai le feau, *"less talk, we need action, less talk, we need action."* O la'u lu'i lea e avatu i le tatou Palemene, ia e polomisi lava oe ia te oe, aua ne i e faaaogaina le masini, le masini lea fatugao. Ia aua foi e ne i e oo i o i le fale lea. A o la'u lu'i i le Afioga i le Minisita o le Soifua Maloloina, aua ne i toe aumaia nisi masini, aua ne i toe aumaia nisi masini, ona o lea o le a tatou maitau o lea o le a faatupulaia le faafitauli lenei, ae o lo o i ou aao le tali o le faafitauli.

Ma le faaaloalo lau Afioga i le Fofoga Fetalai.

FOFOGA FETALAI: Ia, malo faasoa i lau Afioga foi i le Minisita, aemaise foi o nisi fonotaga sa i ai ma taumolimoli mai se feau taua. Ia pei o le auga lava o a outou saunoaga o le puipua lava, o le puipua lava le mea aupito sili ona taua. O lea e pei e maitau atu e le Nofoa, ia o le auga lava lea o saunoaga a le Maota.

Ia, se i tulai mai le sui usufono mamalu, le sui usufono tamaitai mai Alataua Sisifo.

Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai - Alataua Sisifo): Faafetai i lau Afioga i le Fofoga Fetalai. E faatalofa atu i lenei taeao fou i lau Afioga faapea sui usufono mamalu o le Kapeneta, faapea foi lenei Itu o le Maota, le Itu Agai, aemaise foi Ofisa Sili o Pulega o Matagaluega ua tatou faatasi, ia ma Samoa ua potopoto.

Ou te tulai atu e fai sina manatu puupuu i le tatou Lipoti o le Faalapotopotoga o Fatuga'o. E logomalie eseese saunoaga i le aso ananafi ma lenei aso. Ae tau lava ina ou faamanatu le tulaga le tualga na ala ai ona faavae le Faalapotopotoga lenei o Fatuga'o pei ona saunoa le Minisita o Falemai, ina ia faafualoa soifua o nai o tatou tagata lea ua maua i le gasegase. Ua tatou iloa lava e le toe oo i se tulaga lelei, a o le auga tonu lea o le faafualoa se i umiuni atu ni o latou aso tatou te mafuta ai i le olaga lenei. E

sa’o lelei saunoaga pei ona saunoa nisi o sui usufono. O le auga atoa ma le ki o lo o i o tatou lima, e amata mai i le fanau mai o le tamaitiiti lea na maua mai e le toatele o nisi. Ou e talitonu foi o manatu o le tele o sui usufono ma manaoga, o manaoga o nai o latou itumalo, o lea e iloa e faigata ona faataunuu ona e tele requirements aemaise o mea tau le vai i le faiga o ni masini i nuu i tua. Ou te talitonu lava o tatou Fono nei ua aoga ai le talanoaina, pei foi ona fai atu sau faamatalaga i le la tausaga i lou fiafia i avanoa ua talanoaina ai Lipoti nei Faaletausaga, ina ia malamalama le toatele, aemaise foi o matou sui usufono faapea foi nai o tatou aiga ma nuu ma itumalo o lo o taputapu mai, aemaise foi le taimi tele na alu o nai Matagaluega e tapena ai Lipoti nei.

O sou la lea manatu e fia faaalua, o manatu uma ua uma ona faaalua, e leai lava se manatu e le vale, e sao uma ma taua. A o le auga lava lea taua ua tatou maua i lenei taeao, o le ki lava o tatou i le amata mai ina ua fanau le tamaitiiti. A o ai lava lea ua i ai, ua lavevea po ua maua latou i lenei faama’i faigata, ma ē foi o la e ua faatalitali lea ua tatou faalogo atu ua oo i le 400 le lisi, o le services lea a le Malo, o le services lea a le Malo, faafualoa ni nai taimi o nai tagata tatou te mafuta ai. O a foi manaoga o matou itumalo, e lafo atu e pule le Malo i le faaso, ae tau ina faalogo mai nai itumalo ua avatu sa matou talosaga.

Ia o le tala lea i lenei taeao. Ma le faaaloalo lava. Faafetai.

FOFOGA FETALAI: Malo faafetai faaso ma le saunoaga e tusa foi o le tatou Lipoti.

Ia se i tulai mai le sui usufono mai Falelatai ma Samatau. Faafetai ua manuia lou faatafagasegase i le aso ananafi. Malo.

Afioga LUPEMATASILA GALUMALEMANA TOLOGATA TOGIA TILE LEI’A (Falelatai ma Samatau): Faafetai i lau Afioga i le Fofoga Fetalai mo le avanoa o lenei foi itumalo o Falelatai ma Samatau e fai ai se manatu puupuu i le taua o lenei foi Lipoti ua i luma o le tatou Laulau a Fono.

Ae manatu ua maea ona e sulaina le alofa ma le agalelei o le Atua i le taeao ua sola, aua o le a so tatou loto e fai, pe ana outou tofafa ma o matou momoe i le pogaisa sa tele ua tuanai atu, ma o tatou momoe atu ai lava e le toe ala mai i lenei taeao fou. Ia pe tatou te feala mai foi ua maua uma i tatou i le faamai o le fatugao. O le viiga lea ma le faafetai i le Atua e le faaitiitia. Ae ou te tulai atu e faaali se manatu puupuu ona o le taua tele o lenei lipoti. E muamua ona momoli atu le agaga faafetai i lau afioga i le Taitaifono ma le Komiti, mo le lauliliuina foi o lenei lipoti taua, faatasi ai ma fautuaga e pei ona tuuina mai. A o le faafetai faapitoa e molimoli atu i lau afioga i le Minisita, le Minisita Lagolago faapea le Ofisa Sili o Pulega ma le Pulega ma

le tatou Matagaluega o lo o fitaituga ma le taumafaiga o lenei foi faamai matautia. E faafetai foi i le Minisita ma le Matagaluega o Tina i nisi o polokalame ua maea ona tuuina atu i itumalo, e ala i le \$10,000 e fesoasoani i polokalame e tuuitiitia ai lenei faamai matautia.

A o le matau a lenei itumalo, o le tatou atunuu e pei o le faafitauli lea e i ai e fiafia puupuu lava. Na avatu foi speakers e fai ai polokalame o faamalositino, ia na manaia foi lava i le amataga, ae alu alu lava tei lava ua faapea atu. O le faafitauli lea o lea e feagai ma o tatou tagata, e fiafia puupuu. Ae o se tuualalo e avatu i le afioga i le Minisita ma le tatou Malo, ia se i tau vaai po o a ni faiga e mafai ai ona faatosina mafaufau o tatou tagata ina ia lagolago mai i polokalame taua a lo tatou Malo lea e taumafai atu, aua o lea e alu ai le tele o seleni.

Ae ou te le au ese i le finagalo faaalua o le Minisita ma nisi, e le tatau ona toe aumaia ni masini. E pau lava si vaega e tatau ona silasila totoa i ai le Malo, e moni o le tau faanaunautiga lea, ia aua ne i toe aumaia ni masini ma ia faaitiitia le aafia o le atunuu i lenei faamai matautia. Ae le mafai ai na tuua le tatou galuega e tatau ona fai, i le tali atu, i le service e tatau ona provide e le Malo ma le Matagaluega pe a tulai mai le faafitauli. Aua e le mafai ona tatou taofia le aumai o masini, pe afai e faatuputupulaia pea le aofaiga o tagata o le atunuu e aafia i lenei faamai matautia. O le mea lea e manatu foi e toatele nisi o lenei itumalo o maua i lenei faamai. Ae o le talosaga foi lea ma le tuualalo e tuu atu i le Afioga i le Minisita ma le Malo, ia se i vaai po o le a se tulaga e mafai ona improve ai ma faaleleia le service lea e tuuina atu i nuu i tua aemaise foi o le motu tele i Salafai aua e mamao. A o le matafai i lenei a lo tatou Malo, e tatau ona o tatou tali atu i manaoga e tulai mai i lea taimi i lea taimi, a o lea lava tatou te ioe ma molimauina. Ia o tatou galulue ina ia mafai ona tuuitiitia le aafia o le atunuu i lenei faamai matautia.

O lea foi e matau ma le agaga faafetai nisi o auauna paia a le Atua o lo o latou maa le meaalofa lea o le faamalalo o gasegase. O le agaga faafetai lea i le Atua ona e ui lava ina feagai i tatou ma le tele o le mau faamai, ae o lea foi e molimauina o lo o i ai nisi o auauna paia a le Atua e i ai le meaalofa lea. Ia se i silasila ane le Malo, po o le a sina fesoasoani e avatu mo i latou ia, ina ia tapue atili ai foi le latou meaalofa taua ua foaina e i ai e le Atua. Ma le isi itu e ao pea ona tatou silasila ma vaavaai i ai, o nei mea uma e tutupu i le lalolagi tou te soifua ma matou ola ai, o se vaega o le olaga, ioe. O lea e saunoa nisi o aso la, faaumi le soifua o nisi o tatou tuua ma le maua i nei faamai. O le vaitau lenei, ua saosaoa ma alu i luma le soifuaga, e le mafai ona o tatou toe foi i tua i le mea sa tatou soifua ma ola ai i le 200 tausaga talu ai. O le soifuaga e manaomia lo tatou malaga faatasi ma le soifuaga lea ua tatou i ai i le taimi lenei, ma tekonolosi foi ua tulai mai, tatou te talia ai mea e tutupu i le ola mai lea taimi i lea taimi. E po o se faamai foi,

a oo mai o se vaega o fuafuaga laulautetele a le Atua, aua o lenei faamai e le iloa pe ua leva ona i ai i la aso, ae le i iloa, ae ua ala ona tatou vevesi ai i lenei vaiata, a sau i luma le atamai o le tagata i masini ma mea ua iloa ai, ia le ogaoga o lenei faamai. Ae le iloa pe sa toatele nisi o tatou tagata sa maliliu ai i tausaga ua mavae. O le tali lava o nei mea uma o faamai, o le tatou toe foi lava i le Atua, ioe ia tatou toe foi i le Atua. O se manatu vaivai lea o lenei itumalo, e fesoasoani ai foi i le taua tele o lenei lipoti, ma avatu ai foi faamanuiaga i le afioga i le Minisita, ma le Ofisa Sili o Pulega faapea le Faalapotopotoga, ina ia mafai ona siitia le auunaga mo tatou tagata. Ma le agaga faaloalo.

FOFOGA FETALAI: Ia malo le faaso, manaia foi le faaso tatou foi i le Atua, ae fai mai foi le Atua, ia fai se tatou galuega, ona tatou...e le faapea o le a tatou o ma tatou tatalo, ae leai se galuega a tatou e fai. E taua finagalo, ia e faapena le uiga o le soifuaga o tatou i ai nei.

Se i tulai mai le sui usufono mo Safata 1.

Afioga LEANA RONNIE POSINI (Safata 1): Lau afioga i le Fofoga Fetalai faafetai ua maua foi se avanoa o lenei itumalo e faaali ai se manatu i lenei lipoti. Ae muamua ona momoli le agaga faafetai tele i le Komiti aemaise o le Taitaifono i le auiliiliina o le lipoti manino a le Matagaluega o Fatugao. E momoli foi le faafetai tele i le afioga i le Minisita i le tali malamalama foi i le tulaga o le gasegase o lo o ua i ai i totonu o le tatou atunuu. Ae faafetai tele i le Matagaluega i le latou galuega fita ma le faigata o lo o tulai mai i le taumafaiga o le soifua o tatou tagata. E pau lava lea lau afioga i le Fofoga Fetalai, a tau tomanatu i lenei vaiata ma le siitia o le soifuaga o tatou tagata aemaise o le tatou atunuu. E talitonu foi e le na o Samoa, e faapea uma lava atunuu o le lalolagi, e siitia lo latou tamaoiga ma siisii foi le tele o mea ua agai i ai lenei vaiata e ala i mea taumafa ma tulaga uma faapena.

I lau la lea faitau, ou te faafetai tele i le Ofisa o Faatoaga i le latou taumafai i le tuleiga mai o mea taumafa Samoa, e sao lelei lava i le taumafaiga e foia le faafitauli lea, o le maua o tatou tagata i le tulaga o le faamai lea. Ae a tatou toe silasila foi i ai, aua o le tele o fautuaga o le puipuiga, e le i oo ina ogaoga ae ua ou toe tomanatu foi au ia i le tatou vaai vaeatu lava le paia o le Palemene. O le tatou fale tapaa lea e fai nei, le tatou falepia lea e i ai nei, le faleava lea e i ai nei. E le o mafai ona taofi e lo tatou Malo, ae o ogaoga ia o le mau faamai. O le mea lea o le faletapaa, o le auga atoa i lau faalogo o le tele o faamai, e ala mai i i. Afai la ua tatou taumafai e puipui, ia fai se tatou Tulafono, pe afai e mafai e le tatou Malo ona taofi ia mea ia. Ae o lou talitonuga, e le mafai leaga ua siitia le soifuaga o le tatou atunuu, siisii lona tamaoiga, tatou te le taofia foi le aiatatau a tagata. A o lau faamalosi,

faafetai i le Minisita, ia tatou faia, o le galuega lea a lo tatou Malo, tapena mea aua o lea e fai le tatou galuega, e tulei o tatou tagata ia malamalama ae le tutusa uma finagalo o le tatou atunuu. E eseese uma lava ona ua siitia le tamaoaiga ma mea ua tatou maua. O lau la tatalo i lau Afioga i le Minisita o mea tatou te puipui i o tatou tagata foia ai ia gasegase o tatou tagata. Tatalo i lau Afioga i le Minisita faia le tiute o lau Afioga tatou te puipui ma malutia le soifua o tatou tagata ma le agaga faaaloalo faafetai.

FOFOGA FETALAI: Malo faafetai. Se i tulai mai le Tama Matua Sala, ua a mai oe? Ua e manuia lenei taeao fou, faafetai ua tatou feiloai.

Afioga Hon SALA FATA PINATI (Sagaga 3): Faafetai i lau Afioga i le Fofoga Fetalai ou te faafeiloai atu i le paia o le Maota, le afifio o Minisita, Sui Minisita faapea foi Minisita Lagolago faapea foi lenei vaega faaupufai o loo agaia lo tatou Malo, ma le mamalu o le aofia o loo tatou faatasi ai. Ofisa Sili o Pulega o Matagaluega. Malo le soifua maua ma le lagi mama manatu o lenei taeao. O lo o auai le finagalo o le Atua i le potopotoga i lenei taeao taua foi se tasi foi o failauga faapea e tau saili i le Atua ma lona finagalo, aua sailiiliga matagi foi aua faamai eseese o loo faapea ona maua ai nisi o le tatou atunuu.

O le mea muamua a ou te fia tautala iai o le loto faitalia o le tagata aua e le na ma le laina tulaga lea ina ua uma na gaosi le lalolagi ma tuu mai le faitalia ia tatou e le Atua. O le faitalia lea e te pule aoao ai oe pe te mulimulitai i le Atua pe e te tetee i le Atua i lona finagalo. Ou te manatu e ao pea ona faaali se lagona o loo ou nofo ma au ona e masalo ua outou silafia le tulaga o loo iai lo matou afioaga. Ua atoa nei le tausaga o loo faapea lava ona faaalua pea le tina Paia o Maria i le suauu lea o loo masalomia lava e le atunuu faapea e le o i ai le finagalo o le Atua. A o le a foi le tulaga ua mafua ai ona aumai pea aumai pea i aso uma le suauu lea taua o le suauu paia lea?

Ou te fia faaleo se lagona ona e matautia ma ofoofogia. O lau faatusa e faapea, vaai i le laupepa lea, e le mafai e se isi o tatou ona aumai le laupepa lea se suauu, silasila mai i le laupepa ae o le laupepa faapea o lo o i ai ata o e taua o le Au Paia ma le Tina Paia po o le Atua foi. E mafai e le laupepa o loo iai le ata lea ona aumaia ai le suauu lea pei ona ou molimau atu ai lenei taeao i luma o le Atua. Ou te taua ma lou ava ma lou faaaloalo e paia e paia, e paia le Atua e ou le malo ma mea uma lava. O ai se e tutusa ma le Atua? Atonu sa faapea le maota po o fea o loo iai lo'u nei tagata, le tofi o lo matou Itumalo ae faafetai, faafetai, faafetai i le Atua o loo faapea ona malutia Samoa. O le mau foi lea o loo ou nofo ma au e le o tatou o faaupufai po o galuega o loo tatou faia ua malutia ai Samoa i ona aao alofa ma puipui mai. A o lea faapea mai le Tina Paia, tau atu i lou Nuu poo fea o iai lo latou faatuatua, fea o iai le faatuatua? Fea o i ai lo tatou alalaga i le Atua? ma o

tatou faapea ifo le Alii e faamagalō mai matou ia e alofa mai ia Samoa. O le feau lea o loo tulai mai pea le agaga o le Atua i aso uma i lo matou Nuu ma fesiligia po o fea o i ai Taitai? Fea o i ai Taitai? O le a le mau a tatou, o le Nuu lenei e le o se Nuu e faia mo tatou o i inei na aumai ai le Atua tatou e fili e le Atua... po o ai le tagata e ofi atu po o ai le tagata e faasee ese mai lona nofoa. O lea ua oo mai le valaau a o fea o i ai? Fea o i ai tatou? Faivavale o tatou talosaga talofa e talofa o lo o soifua le Atua i le maota lenei oi tatou uma lava o le vaai lea ma le meaalofo lea a le Atua, o malumalu sa o le Atua taitoatasi o tatou uma lava aua tatou te faagalō.

Ou te faamalulu atu i le Maota i le faafofogaaga a Samoa leaga e leo a'u lea tautala o le agaga o le Atua lea e avatu ia te a'u. Ua ulufia a'u i le agaga o le Atua e tatau ona ou avatu le mataupu lenei pei foi ona faapea mai ia Noa i le Nuu, omai tatou fau le Vaa omai fesoasoani mai i le fauina o le tatou sa a oo mai faaletonu, o le tatou toomaga lea aua nei galo taitai e o le atunuu aua nei tuulafoai, aua nei e tatou nutimea faatasi a sae le tatou Vaa ia sae faatasi poo lae tatou te iai. A ia faamanuia mai le Atua i le mafutaga faapea le tapuaiga a Samoa. A o lou tala lea ou te avatu pea o le Aso Sa nei o loo i ai le fuafuaga e alu a le malaga Sa e amata atu i Apia e oo i Falelatai, upu nei e lei aumai lotu Pope poo Maria le Agaga na o le lotu Pope. Leai leaga o le Atua o le Atua o Lotu o tapuaiga eseese. Afai e te talitonu e soifua le Atua lea ua ou tau atu le avanoa tonu a lea le avanoa lea mo se isi a poo a Ekalesia le avanoa lenei ta te ifo toele ai i le Atua ma lona finagalō, tagi i le Atua e fesoasoani mai. Le a le mea ua tupu ia Samoa, e leai se mea o tupu uiga o le soifuaga faapolokiki lea iai tatou e leo se mea faatoa fai nei le feutagai faapea ma fetalai o le polokiki, savalia le 20 tausaga o saofai i i le Maota lenei. E le o au lea ou te saofai ai ii ao le alofa tunoa o le Atua na mafua ai ona saofai ii o ai nei tagata? O ai a'u i lo'u vaivai faafetai i le Atua faafetai Atua ua tatou molimauina le ofoofogia ma le matautia o lona Tina Paia Maria ou te faafetaia lenei taeao. Ou te faafetai faapitoa i le Minisita o le Falemai Valasi leaga o le tama o le Motu faimea mafai e talitonu foi e le faigofie le mea o loo moomoo ai nisi o le atunuu, o le aumai lea o masini ia e faamama toto. Masalo ua tou silafia mafuaaga na maua ai ia Masini nei o se toeaina o Mulitalo. Faafetai lea toa manumanu o le atunuu sau mai Puapua, Lago ma Asaga. E fai le tala o molimau faapea na tagi i luma o le tamaloa a Signapore se mea ofoofogia lea mea ae o le manao o le tamaloa e faatea ia e aveese mai le Minisita Samoa lea ua malomaloa, ae ua matua tagi a le toeaina lea na maua mai ai tatou masini. Tele matata tele ia aitia e fai ai ae ou te faafetai ia Mulitalo ana le seanoa Mulitalo lea molimau Laauli, taimi o matou o le toeaina foi e malie a foi le toeaina. Ia o uiga lava ia o le soifuaga, ae ou te faafetaia pe a o iai se agaga e aumai ia masini o le mea muamua a ou te talosaga atu ai i lona itu lau Afioga i le Minisita ma le Matagaluega o Tupe le Minisita o Tupe ma le Aiga Kapeneta. E moomia e Savaii se falemai

fou i Salelologa, ua leva ona pologa ma faapena iai le motu tele. A aumai Falealupo e taamilo mai i i Salega, e omai pu'e le pasi i i Salelologa toe o ai i Tuasivi, ia ona faapena a lea ona fai taimi lenei. Ua tataua ona o se luitau lelei lea mo outou fau le fale, le fale lea a tupu i le tausaga lea o le a sau oka oka se manaia. A o se mea e tataua ona fai ua pologa le tatou motu i Savaii. Afai o mea uma a e pei a o Apia nei lea e manuia, tulai mai lea o si tama ia Tofilau ona o le manatu o le toeaina i Savaii sa faapea ai lafoga, o mea e lelei i Apia e ao foi ona fai i Savaii, ia lelei Savaii ae o la'u lea mau tuu atu i tafatafa o le aiga Minisita e le masalo pe a ma se \$100 miliona e fai ai se tatou loan mai Saina e faatino ai lo tatou faamoemoe. Ae a tulai mai oka oka se manaia o lea fuafuaaga, viia le Atua aua o ia e auala mai ai meauma faamanuiaga ma vaega eseese pei ona manaomia.

Saunoa le Minisita o Tupe faapea a o le a le mea o le a toe aumai ai le masini faamamatoto? E tau auai sou manatu i le finagalo o le Minisita ona pei o le a foliga mai o le a faatuputupulaia le agaga lea na nofonofo ai ua le faatinoina lea e le tagata i lona faaeteete i le faamai ma avea ai lea ma mea e faatuputupulaia ai le faamai. Ae ou te talitonu e na o maua lea manatu faapea a o le lalolagi o finagalo o Samoa ia faatu se isi vaega fou o le faamama toto ma tulaga ia. Ou te faafetai foi i le Ofisa Sili o Pulega o le Falemai, le Afioga ia Aiono. Faafetai i lea Tamalii, ua matauina ma le agaga fiafia mea o loo tutupu mai uta. E moni lava e iai a togafiti e fai, ae alualu a maua le tama pe maua foi le teine o Mary i se mea. Ae tautuana ma outou le aufaigaluega fai mea, o tatou sao lea i le atunuu o lo faamaoni ia te oe lava o lou faamaoni foi lena i luma o le Atua ma Samoa. Lau Afioga i le Fofoga Fetalai malu ave i fale sou finagalo e faitau atu foi ma e matau mai i le tele o lafoga ma tulaga e faatiga ai le Maota i lau Afioga, leaga o oe a o le te tu i le foemua o le atunuu, le nofoa vaevae loloa sei tulou ae tautuana ma oe ia e silasila alofa foi, e toagaogao le matou vaega. E le o se agaga leaga e avatu ai le fautuaga, o le agaga e nutimea faatasi, ia taunuu le sa ae fai mai, ia Viia le Atua soifua ma ia manuia.

FOFOGA FETALAI: Ua faamalo saunoa malo foi le malele lau Afioga foi i le Tama Matua sui usufono mamalu mai Sagaga 3 atonu ua tele foi se feau ua e momoli maia i le maota fonu o le atunuu. O le feau ua faaleagaga aemaise foi o fautuaga faatama matua i le tatou maota, o le mea lea malo faafetai mo le feau, lea lava ua molimoli oo uma aemaise foi le faamalosiau i le Minisita ma le Pulega foi o le tatou falemai male faamama toto. Malo faafetai ou te talitonu o lea ua taofai uma i lau saunoaga nisi faamoemoega o nisi manatu o foufou mai, ona o lea ua matau atu ua tele a sui faaalua o latou finagalo i le foi taua o lenei lipoti ua lava ia puipuiga o le soifua maloloina o le atunuu ae malo saunoa sei tulai mai lau Afioga i le Minisita o Faatoaga ma Faigafaiva.

Susuga Hon LAAULI LEUATEA POLATAIVAO FOSI (Minisita mo Faatoaga ma Faiga Faiva): Ioe ua tatou tulalata i le tatou malologa ae ua ou manatu e le nofonofu ai lava i saunoaga ua oo i ai lenei taeao alu ananafi alu anapo ua ta toe mafaufau lelei i le tuga o le mea le tatou te talanoaina faamamaina o toto o le tulaga lena na avatu ai foi se tuualalo ananafi lau Afioga i le Fofoga Fetalai poo ai e amatamea i le mataupu lenei lau lava lea tuualalo na avatu ananafi o iinei i le tatou Maota e avatu ai le taimua tatou te o ai e fesoasaoni o le tuga o le mataupu o le Soifua Maloloina ae ua ou matau i le saunoaga a le Afioga i le Sa’o fetalai lea faatoa uma ma le Afioga i le sui o Falelatai ma Samatau sa ou nofonofu a ma le isi faamai lea ua tele foi le faaletonu o le tatou atunuu o le Loto , o le loto e tataua ona faamama le loto ia ua manaia tele le saunoaga le Afioga i le Sao fetalai a mama o tatou loto ia na tatou omai lea tatou galulue faatasi o iina e fusi ai le mea lea sa ou atugalua ai e le nao meaai lea tatou te mamai o le stress , le isi faamai e fua lava i le sinasina o lou ao ona e iloa lea o le mea o loo e nofo ma oe male faamai lililo e tupu ai foi le maliu ae faafetai i le Afioga i le Saofetalai o lea ua maua le fofu o le faafitauli o le faamama lelei o lou loto ona e nao le Atua e mama ai meauma ia tatou omai laia e fesoasoani i le faaletino lea na e saunoa iai e le aoga ona tatou tatalo , tatalo ae leai se galuega e faia pei o le manatu lena ua ou tulai atu ae tatou te lei o e tali le malu taeao i meaai faasoifua maloloina lea la tatou taumamafa ai nei ae ua taua le faamanatu le Afioga i le sao fetalai ma le faaaloalo.

FOFOGA FETALAI: Malo faafetai saunoa i lau Afioga i le Minisita o Faatoaga ma Faiga Faiva aemaise foi o le toe faaopoopo atili o le saunoaga i le Saofetalai Afioga ia Sala ae pei a ona fai atu ua atoa uma mea uma lava i saunoga e pei ona, ia se i tulai mai la lau Afioga i le Minisita o le Siosiomaga.

Afioga Hon TOEOLESULUSULU CEDRIC POSE SALESA SCHUSTER (Minisita mo Punaoa Faalenatura ma le Siosiomaga): Faafetai lau Afioga i le Fofoga Fetalai mo le avanoa faafetai atu foi lenei taeao i sui usufono mamalu uma o le Fonousu a Samoa. E lua a nai vaega ia ona e matau atu e le i oo i ai se fingalo o nisi o sui o le tatou Palemene. Vaega Muamua: E talitonu le agaga ua faatauaina uma e sui e leai a se isi e le i faaali se finagalo i le taua o le galuega e ao ona faatino.

Lua, o lea ua tuuina atu tatou tai \$1 miliona i itumalo. Afai e taua i Afioga i sui usufono ma afioga foi i Fono Faavae. A mafai ona faataoto ese po o se \$10,000, 1% o lau miliona, e faatino ai le polokalame lea e tele ina saunoa uma i ai, aemaise lava le vaega tau preventative, e mafai ona faatalanoa ma galulue ai itumalo. O le faigata foi o le galuega a le Pulega ma Matagaluega, ona e le o i ai le atoatoa i afioga ma alaalfaga. A o le talosaga lea, afai e

mafai e itumalo, silasila i ai i lea vaega. Ona lua lea lau Afioga i le Fofoga Fetalai, o le tatalo i le Pulega, pe mafai ona tapena se template po o se galuega foi lea e mafai ona faatino i itumalo i le seleni lea i tausaga taitasi. Ou te talitonu o le tele ia o le sao e mafai ona faatino ai i tua i itumalo, o le galulue faatasi foi lea o tatou itumalo e ala i seleni o lo o tuuina atu ma faatino nisi o polokalame e le o mafai ona faatino e le Pulega ona o le utiuti o le seleni ua tuuina atu i ai. Faafetai.

FOFOGA FETALAI: Malo faafetai. Ia o lea e faafogafoga foi sui usufono taitasi ma Taitaifono o itumalo taitasi, e taua foi le fautuaga a le Minisita mo le agai i luma. Ae taua foi le finagalo o le sui usufono mo Falelatai ma Samatau, ona o le tatou atunuu lava e pei e fiu gofie. A o lea ua faafogafoga mai le mamalu o le atunuu, ia e taua tele i Taitai o le atunuu le faaaauau pea o nei mea uma aua lava le soifua maloloina. Ae faamalo faafetai.

Ona o lea ua tatou taunuu i le tatou malologa o le taeao, o le mea lea o le a faataatiaese ai Galuega a le Fono Aoa mo lana malologa o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:46 i le taeao ma toe amatalia i le itula e 11:18 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Ou te tapa lau Afioga i le Sui Palemia mo le lafo.

LAFO MO LE SUIA O ITULA FONO

Afioga Hon TUALA TEVAGA IOSEFO PONIFASIO (Sui Palemia): Lau Afioga i le Fofoga Fetalai ua matu i fau ua sao i alo le tautega i le paia a leni Palemene ma le Maota. Faafetai i le Atua i Lana foai. E manatu foi ua maua se faasiligamalosia aua le toe faaaauuina o a tatou galuega.

Ua faafogafoga le Maota i le tatalo mai a lau Afioga ona o le tele o a tatou galuega o lo o totoe, ae i ai le naunautaiga e fia faamaea. Ou te tulai atu ai ma le faaaloalo lau Afioga e faatu le lafo, *Ina ia faataatiaese Tulafono Tumau 32(1) mo le Suia o a tatou Itula Fono mo le Aso Fono leni e faapea: Tatou faaaauau seia aulia le itula e 1:00 i le aoauli ona faataatiaese lea o tatou Taulumaga mo le toe faaaauau ai i le itula e 2:00 i le aoauli ma faagasolo atu ai seia tolopo i le itula e 6:00 i le afiafi a nanei.*

O le lafo lea ma le faaaloalo lava lau Afioga.

Faaluaina e le Minisita mo Faatoaga ma Faiga Faiva ma le Minisita mo le Soifua Maloloina.

Na faamaonia le lafo.

FOFOGA FETALAI: O le a faaauau le tatou galuega e tusa ai o le lafo ua faamaonia e le Fono Aoao.

E faataatiaese tatou Taulumaga mo le malologa o le taeao ua maea le saunoaga a le Afioga i le sui usufono mo Sagaga 3. Ia ma ou te iloa foi o le aotelega le o le tele o a outou saunoaga.

O le mea lea, o le avanoa lenei e tuuina atu i lau Afioga i le Taitaifono mo le tolaulauga foi o nisi o mataupu na laga e sui usufono mamalu o le Palemene.

Afioga LAUMATIAMANU RINGO M. PURCELL (Taitaifono Komiti o le Vaega Tau le Va Fealoai): Ia, e momoli le agaga faafetai i lau Afioga i le Fofoga Fetalai, ae faapea foi le Ofisa o le Fono i le malutaeao fou ua saunia, e talitonu ua sao i alo.

Ae ou te tulai foi e fai au ma sui o le matou Komiti o le Va Fealoai e fofogaina foi ma tali atu i nisi o manaoga aemaise o fautuaga ua tuuina mai aua le nofo silafia e le Maota. Lau Afioga o le mataupu na laga e sui usufono mamalu, e i ai le talitonuga ua toeitiiti lava atoa le tatou Maota ua saunoa i tulaga uma, pei ona i ai fautuaga, o manatu foi ua faaalua e faufau ai le Komiti, aemaise o le faafofoga foi a le Minisita ma le Matagaluega e tusa ai ma mataupu na laga.

O le sui usufono mai le itumalo o Siumu, lau Afioga Tuuu ia po o lau Tofa foi Tuuu i le tulaga sa talanoaina mai ai tatou blood test. Ia o le naunautaiga lena o le Matagaluega ina ia faatino vaega ia o le sueina o outou toto, ina ia mafai ona maua po ua aafia ou fatugao, ae te le i oo atu i le nofoa. O le naunautaiga o le Matagaluega, ina ia aua ne i e oo i le nofoa. O le nofoa lea, o le nofoa lea o lea e faamama ai le toto. A outou silasila i ai i le fale fou lea ua i ai, ia e lanumumu nofoa. O le sign lena o le – its a very dangerous, e matautia le tulaga e oo i ai le tagata pe a maua i le faamai o le fatugao. Ia sala umi foi ni saunoaga a o ni manatu sa faaalua i le aso ananafi aemaise foi lenei taeao aua e maua loa le tagata ina ua faaleagaina fatugao, ia e tasi lava le vaavaai foi, ia ua lata, ua e lata foi i tulaga e oo ai i le maliu ma le oti.

O le faamai lenei pei ona outou silafia, ia e fai lava si tuga, ona o le tatou faatamala, mai lava i le laitiiti seia faasolo mai ua matutua, ia e i ai lava le naunautaiga e malo lava le manao i mea e iloa e mamai ai o tatou tagata, ia ma faaleagaina ai fatugao pei ona saunoa foi i ai ma fetalai i ai nisi o le tatou Maota. Ia, e pei foi ona saunoa le Minisita o Aoga i aoaga foi sa auai atu i latou i ai, ia o le Early Childhood Development, e muamua lava meaai ia ma

le lufilufiina o aoaoga sa i ai i latou, ia e maitauina e pei e faataua lava le vaega lea o le nutrition. O lo o faamauina foi e le Komiti nei fautuaga foi e pei ona aumai.

O le saunoaga a le Afioga ia Peseta. E faamauina le fautauga a Peseta e tusa ai foi o meaai faatau i autafa o auala aemaise o meaai gaosi i faleaiga. Ia o le a silasila i ai le Komiti aemaise foi o le Matagaluega o lea e faafofoga mai le Afioga i le Ofisa Sili o Pulega i le asiasia o meaai o lo o faapena ona faatau i tafaala aemaise foi o faleaiga i meaai gaosi aua le fofoga taumafa o tatou tagata. Ia pei foi ona e faaalua tulaga foi i se isi falemai e faatuina i Vaitele, ia o lo o faafofoga atu le Minisita e tusa ai foi o le talosaga.

Faafetai i lau Afioga i le Minisita mo Faatoaga, aua e pei o lau Afioga o lo o matua i ai le faatofalaiga, aua e pei lava o meaai lava le mafuaaga o mea uma. E pei ona e saunoa i lafumanu, ia o povi, o papuaa, o moa ae faapea foi meaai faisua o maukeni, o kukama, o soko, o Isalaelu, o Aikupito, o mea uma lava ia sa e saunoa i ai, ia, ua faaosofia foi ma maua ai lagona o sui usufono mamalu uma o le Palemene aua le fofoga taumafa. Ae pau lava le fautuaga, ia aua ne i tuia a tatou moa pe a oo i le taimi e faaoga ai moa, ina ne i pei foi o moa ia sa saunoa i ai ua pei o se size 2 i le tulaga foi o tatou fofoga taumafa.

Sa fesiligia e le Afioga ia Alaiasa po o le sui usufono mai Anoamaa tulaga foi o le 64 o tatou nofoa. Ia, e manatu o tulaga ia, i le tulaga o le 64 nofoa na taua, o le toe faamaninoga o le vala lea, e oo atu i le 64 avanoa o lo o i ai i totonu o le falemai fou lea, pe 64 palaka e mafai ona faaaogaina e sulu i ai masini. I le taimi nei la pei ona saunoa le Minisita o le Falemai, ia, e na o le 32 masini o lo o i ai i le taimi lenei mo le faaaogaina, a o lea ua talia ma approve e le Kapeneta isi masini e 30 e faapena ona faaaogaina ai le tatou falemai fou lea.

Ia pei foi ona saunoa lau Afioga e tusa ai ma fesiligia le 18 o le aufaigaluega ae \$2.1 miliona le tupe o lo o faaaluina ai. O le 18 o tausisoifua o i latou ia o lo o faatinoa le galuega lea o le fesui ai o masini i lea taimi i lea taimi, a o le aofai o le aufaigaluega e 34. A tuufaatasi la le 18 ma le 34, e 52 le aufaigaluega a le Matagaluega lea po o le vaega lea o le Faalapotopotoga Tau Fatugao. O lo o maua i le Itulau e 27 o le latou Annual Report 2019/2020 i le bullet point 11 o lo o vaevaeina atu ai tulaga foi o seleni faaaluina aua le galuega o lo o feagai ai ma le Matagaluega.

Ua fesiliga foi le tulaga i tagata maliliu i le tausaga lea 2019/2020, silasila i le Itulau e 8 o le Annual Report, o lo o faamauina ai e 19 tagata maliliu i le tausaga lea faaletupe 2019/2020. E le o aofia ai nisi tagata na maliliu lava i le faamai e le i oo atu i o i le vaega foi o le NKF. Ae faafetai atu i lau Afioga i le sui usufono mo Aleipata Itupa i Lalo mo le tatou menu sa e faaalua i le aso ananafi, lea la ua vaavaai i ai i lenei taeao lea lava ua amata ona follow ai le Failautusi ma le aufaigaluega e tusa ai o lea vaega.

E faamauina foi e le Komiti lau fautuaga e tusa ai foi o le aoaoina o tausisoifua ma tomai faapitoa tau faamamatoto. Ia o lea e faafofoga atu le Minisita ina ia aafia i le falemai fou o lo o faapena ona faamoemoe e aoaoina ai i latou foi o lea e galulue ma fia maua lea tomai o galuega faatausimai.

E talitonu o le tele lava o a outou fautuaga ma timaiga o lo o faamauina e le Afioga i le Minisita e le au i ai le malosi o le Komiti lenei, ae na ona matou fautua ma tuualalo ia pe a oo foi i taimi o Lipoti, ae ua silafia o le Afioga lava i le Minisita e aumai ai le ioega.

E muliai se matou faamatalaga i le tulaga foi o le faatinoina o le galuega. E momoli atu le agaga faafetai i lau Afioga i le Ofisa Sili o Pulega o le Fale Faamamatoto i taimi foi a o feagai outou ma faamai, aemaise o le tautuaina o si o tatou atunuu i tulaga foi pei ona saunoa ma tanoa i ai le tatou Maota i lenei Fonotaga.

O nisi foi o manatu e faaalua i le tulaga i le aumai ma le lē toe aumaia o tatou masini fatugao, ia e i ai le talitonuga i le matou vaai faa-Komiti, o lo o tupu pea, tupu pea faamai mai lea tausaga i lea tausaga. E i ai le talitonuga o lo tatou tofi lea na tofofi mai ai tatou tatou te faia tonu ma aua ne i faagaloina foi o tatou tagata ua maua i lea ma'i. Ae ala foi ona maua i ma'i, o le lē tausii lava o le tagata ia i lona soifua ma tulaga faapena. Ae o le agaga o le Komiti, ia maua lea auaunaga i le tatou atunuu. E le mafai ona tatou vaai atu e tuu lava se i valaau mai i ai le Alii, o tatou tofi lea o tatou o Taitai o le atunuu, ia tatou te taumafai ia provide service ia aua le tausii o le soifua ma le ola o tatou tagata.

E faamauina foi le tele o fautuaga, aemaise foi ua saunoa le tofi o Falelatai, e moni e fiafia puupuu si o tatou atunuu, a o le fiafia ma le umi o le soifua ma le ola e i ou lava aao ma o matou lima, e pei ona talanoa atu i ai. E maua foi i le aso o le matou faatalatalanoaga ma le Matagaluega, e i ai le tina na aumai mai Niu Sila, transfer mai Niu Sila. Ia mo le silafia e 24 tausaga o ola i le masini. Afai la e 24 tausaga, ia o se vaaiga foi lea e mafai lava ona umi ai le soifua ma le ola pe a tatou tausii i a tatou meaai, aemaise foi o le faalagolagomaga pei ona saunoa i ai nisi sui i le Alii, tatou te ola foi ma tatou faatuatua ae alu faatasi lava ma le galue i tulaga uma.

Ia e faapitoaugafa se faamatalaga i lenei aso, e momoli le agaga faafetai i le Afioga i le Minisita i lou taliaina ma lou usitaia foi o tuualalo a le Komiti e ala i a tatou masini. O lea ua ioeina e le Kapeneta ina ia aumai le isi 30 masini e faapena ona faaaogaina aua le tautuaina o si o tatou atunuu. E tupu lava faamai nei ma e tupu foi tagata mai i tausaga taitasi. O le matou vaavaai lea. Ae o tatou o Taitai ia tatou faia se mea e mafai ona tali atu ai ma faaumiumi atu ai le soifua o nisi ua aafia.

Ia, o le matou talanoa atu lea lau Afioga e tusa ai o ni mataupu sa laga, a o le tele lava o fautuaga aua le taofiofia o lenei faamai, ia ma aua ne i tatou oo

i le nofoa mumu pei ona talanoa ai le Lipoti. O le matou tala lea, ia manuia tele le Fono.

FOFOGA FETALAI: Malo saunoa i lau Afioga i le Taitaifono.

Tofa Hon Tuuu Anasii Leota (Siumu): Lau Afioga i le Fofoga Fetalai pe maua se avanoa...

FOFOGA FETALAI: Ia, se i tulai mai le sui usufono mo Siumu.

Tofa Hon TUUU ANASII LEOTA: Faafetai lava mo le avanoa. Na o le isi lea mataupu sa ou laga sa ou fesiligia po o i ai se fesoasoani o tuuina atu i tupulaga? Fanau iti ia ua maua i le toto maualuga, o le suka ma tulaga faapena. Po o i ai se faamama-avega ia i latou, aemaise lava o fualaau ia e faaaoga mo le tuuina atu ia i latou ia? Ma le faaaloalo.

Afioga Hon Valasi Luapitofanua Toogamaga Tafito Selesele (Minisita mo le Soifua Maloloina): Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le Minisita mo le Soifua Maloloina.

Afioga Hon Valasi Luapitofanua Toogamaga Tafito Selesele: Ua leva ona tapena lelei le tali mo le sui usufono lea ona o le mataupu tau le... sa saili i le Matagaluega, ae aua le popole le sui usufono o le a oo atu i ai se...

FOFOGA FETALAI: Ia, o lea ua sauni le Minisita e tali atu foi i nisi o mataupu e le i oo i ai le saunoaga a le Taitaifono ina ia malamalama atili ai foi le tatou Maota.

Ia se i tulai mai, ou te tapa lau Afioga i le Minisita mo le Soifua Maloloina.

Afioga Hon VALASI LUAPITOFANUA TOOGAMAGA TAFITO SELESELE: Ua malie lava le lele a le lupe lelemalie i le faalelegafulu a le Maota i le tofa ma le faautautaga a sui usufono mamalu o le Palemene. Aua o le Maota lenei, o le Maota o tupu o le atunuu aua le tofa saili ma le faautautaga.

E momoli le agaga faafetai ona o le talitonuga ua tele lauga o lenei Lipoti. A tele lauga, e atagia le taua. O le agaga lea ma le vaavaai totoa i le Lipoti lenei, i le ma Lipoti ma le Minisita ua le nofo mai, le Afioga ia Faimalo. Ae to lava le pulou i na vaitau i le taumafaiga o lenei Faalapotopotoga a le tatou Soifua Maloloina, o lea la ua tauaveina i le taimi lenei. E momoli le agaga faafetai. E le o nofo mai le tamaitai sui usufono, ae le mafai ona faagaloina

galuega lelei ma tiute. O lea foi la ua oo mai i le matou vaitau ma lenei taimi, o lo o tausisi pea, ina ia mafai ona aveaveai i tulaga e pei ona i ai.

I le matau i le Lipoti lenei lau Afioga i le Fofoga Fetalai, e 17 sui usufono na sausaunoa. Ma e momoli le agaga faafetai. Malo le amanaia o le Lipoti, aemaise le taua, i le faatauaina o galuega a le Pulega i le tama o lo o taitaia le Komiti Faafoe, ia o le susuga foi i le fomai, aemaise foi le Komiti Faafoe ma le Susuga i le alii Ofisa Sili o Pulega. Sa ou vaavaai i le Lipoti sa ou faapea o le a pue mai ata o le Tamaitai Minisita sa tauavea lena vaitau, se ata foi lea se i maitauina ma vaavaai, ae pei na o le ata o le Taitaifono o le Komiti Faafoe lea e tulai mai i le tusi. Ia a o se ata foi o le Ofisa Sili o Pulega i galuega lelei ma mea taua. Ae ui i lea, ia e le taua le ata ae taua le Lipoti. Faafetai i le Matagaluega aemaise foi le silasila i itu uma.

O le tele o nisi mea ua tali le Taitaifono, a o lou lava sui usufono a oo loa ina tali mataupu laga, ia e le mafai lava ona faatauagavale. I le 17 lea o lauga a sui usufono mamalu, o le tele o saunoaga o le puipuiga, e faasino lava i le puipuiga po o le prevention, ina ia taumafai le atunuu ina ia faaitiitia faamai le pipisi, aua o i tonu lea e taoto ai le... . E tatou te fiu e lauga ma talanoa i le mataupu lenei o le afaina o fatuga'o ma oo atu i masini faamamatoto, ae a tatou le asiasi i a'a o le faafitauli, ia, e tatou te talitonu lava e le mafai ona tatou ausia tulaga e pei ona i ai. Ou te iloa a lelei tapena nei, masalo o le isi 10 i le 20 tausaga ua tatou vaai i ni foliga lelei o le atunuu. A o le taimi lava lenei o tatou e pei ona malie i saunoaga a sui usufono. Ma o le mea moni lava, e le faigofie, e le taugofie, e le mama le tauaveina ma le faafoeina o le puipuiga o le soifua o tatou tagata ina ia mafai ona tali atu i le faafitauli ogaoga.

Sa ou lauga i se tasi taimi a o amataina le uluai Tala o le Tupe, sa ou taua se tasi o mau a se tagata atamai i Peretania o Matthew Miles, o lea tagata o se Philosopher sa vaai i faafitauli e tutupu mai ma na ia faapea ai, e 3 lava mea taua e oo i le tagata soifua pe a feagai ma faafitau. Ua ou taua lenei mea o le faamai o fatugao, o se faafitauli ogaoga. Fai mai la lea tamalii atamai, o le mea muamua e oo i le tagata soifua pe a tulai mai se faafitauli, o le pepelo po o le tusitusilima. Se o Simi e mafua ai, o le susuga ia ai e mafua ai. O le vaaiga lona lua e feagai ma se tagata soifua pe a tupu mai faafitauli, o le sola ese mai le faafitauli ma lafi mai le faafitauli. A o le vaega lona 3 ou te fia faamamafaina i lau lauga ma toe aumai, fai mai lea tamaloa atamai, galue i le faafitauli.

O lau fautuaga i le Maota lenei i lauga uma sa ou faalogo i ai, e ese le taua. O le tatou taumafai e fau ia galueaiina le faafitauli o le faaitiitia o tagata o le atunuu e mafai ona oo atu i le faamamaina o le toto. O le ala lea ou te fautuaina le Maota, aua tatou te faapea ifo o ai e mafua ai, o ai e tatau ona togafitia. Aua o le mau lava lea, seiloga e asiasi atu le Soifua Maloloina ona faatino lea o togafitiga ma tulaga faapena. A o le mau, faalautele se manatu

e afua ia i tatou o Taitai o Samoa, Taitai o le atunuu i o tatou itumalo, ia tatou pesepese pea ma faamanatu ia Samoa le primary health care. O le primary health care, o le uluai sailiiliga lena a le tagata soifua mai tua i nuu ma alaafaga ina ia mafai ona faaitiitia le faamai le pipisi. O le ala lea o le tatou vaai i le tele o ma'i ua ave i fafo, tele le tupe a le atunuu o lo o aveina i fafo. E mafua aisea? E mafua mai tua i le uluai care e tatau ona ave i le tagata soifua. Ia ona oo mai lea i tatou falemai ona faapea lea, se o le leaga o fomai, o le leaga o tausimai, leaga le Soifua Maloloina. Ae ou te talitonu tatou te ioe faatasi o le tatou tiute lea ia tauave i o tatou nuu ma itumalo aemaise lava tulaga e pei ona i ai.

Faafetai i le Failautusi a le Fono lau Afioga i le Fofoga Fetalai. E maitauina i le taeao lenei pei sa tuuina atu le tuualalo, e ese le manaia o le breakfast po o le lunch po o le a lava. Ia o mea taua ia, o fruits. E faataitai ia aua ne i faia i le manao o le sui usufono po o le Palemene, a ia fai i le manao o le Minisita lea e fai atu o le Soifua Maloloina. E taua, aua e leai se aoga o tatou tofiga ae le faaaogaina. O le ala lea, o se Minisita po o se mau a le Minisita o le Falemai po o le Soifua Maloloina, ia aua ne i toe faia ni tatou taumafa mamafa, ia tausolomua ia tatou o le Palemene o Taitai o le atunuu ona faataitai i tulaga e pei ona i ai.

Ona ou oo mai lea i le saunoaga a si ou uso a sui usufono mai Siumu, o le taua ia. Ia o le tali masalo e te le i silafia lau Afioga i le sui usufono, o fanau uma lava mai le amataga e oo i le 15 tausaga, o lo o vaai fua i le falemai. Ma afai o fanau talavou e i ai ma'i tumau pei o mea ia e faatonu ai a latou fualaa ma mea faapena, e avefua foi. O le mea lena, e oo i tamaiti ua 18 tausaga pe afai e i ai le autalavou e ova atu i le 15, ia o lea e faafofoga mai le Pulega. O le ala lena e tele fesoasoani e le gata ina vaai fua, ae avefua foi vailaa po o tatou fualaa. Ia o le tali atu lena i lau Afioga i le sui usufono. Faafetai mo le laga. E ui lava e le o ni Tala o le Tupe e lauga faalauaitete sui usufono, ae leaga o lea ua lavea i totonu o le Lipoti, ma o le Minisita e le mafai ona tali faaoleole i se mea, e tatau ona manino.

O lea la mo le mamalu o le Afioga i le sui usufono sa laga, e ese le taua, o lo o vaai fua i le falemai alo ma fanau e tau i le 15 tausaga, o lo o avefua foi fualaa ae le gata i lea, o tupulaga talavou foi ia o lo o i ai mai tumau e pei o mea ia e gasolo ai i le falemai e pei o suka ma toto maualuga ma mea faapena. Ia o lea lava e faafofoga mai le Pulega, e le o se tala aveane ai a le Minisita. Faafetai i le Pulega mo le silasila i lea vaega taua.

Ia o lea sa ou faailogaina le fesili a le sui usufono mo Anoamaa, tasi lea sui usufono fesili lelei. O le fesiligia o le 18 o le aufaigaluega, o lea ua manino i le tali ona o lo o i ai vaega foi lea e ese mai ai potu faapitoa, e pei o le konesale, o inisinia o masini. E le tutusa uma totogi o i latou o lo o vaaia gasegase aemaise tulaga faapena. O lo o i ai foi i i pei ona faafesili le Taitai o le Itu Agai i tatou fomai faapitoa. O lo o faamatata mai i le itulau e 9 o le

seleni e amata loa ona teuina le fanua tele tele lea mo le centre lea mo Salafai. Atonu la leaga o Tuasivi ua iai afaina, ua tele ina aafia le eleele o loo tu ai i mea o le galu i suiga o le tau i lenei vaitau aemaise ua amata foi ona pumoomoo ae atonu o lea ua uma ona iai sailiga ma ua faataoto foi sailiga mo se tupe e ona fausiaina ai le tatou falemai tele lea i Salelolioga.

Lau Afioga i le Taitai o le Itu Agai aumai lou faatuatuaga, ia tatou tatalo pea i le Atua ina mafai ona maua nisi fuafuaga lelei aemaise le faatautaiga o fuafuaga e pei ona iai. Fautuaga a le Minisita o Aoga e pei ona tuuina mai e moni a au o le galuega lava lea ia toe faafoi i tua i tulaga e pei ona iai le soifua o tatou alo ma fanau aemaise foi o lea foi ua fautuaina malosi le Matagaluega, ina ia asiasia faleaoga, asiasia canteen o faleaoga, asiasia faleaiga masalo ua faafofoga i nisi o faasalalaua atu talu ai nei ua feololo nai faleaiga ua tapunia talu ai lava o le le tausisia o tulaga e pei ona iai e taua ia o fautuaga a le Sui Mamalu o Faasaleleaga 5. E le gata i tulaga e pei ona iai ia le tele o Faleaiga ae ou te iloa o le tele a o Faleaiga ia tatou te matauina e pei a kuka le pipi po o le mamoe susunu i le afi sei tulou, fiafia tele o tatou tagata e faatau BBQ. A o le tele o na BBQ e le vela lelei e fautuaina foi lo outou mamalu ina ia aua nei toe fiafia i na mea o BBQ aua o pisinisi e maua ai le tupe, ae ou te faiatu e mai ai le tagata. O lea la ua faagasolo fuafuaga a le Matagaluega ina ia taumafai e asiasia uma ia pito aua o le aotelega o tatou lauga i le aso ma ananafi, o le tatou naunau i se puipuiga lelei. Aua la nei tatou tuuaia poo ai e sese ae a fua mai a ia tatou a tatou o atu e faatau na o na e tu a i luma suesue. O le tiute o tatou o Taitai o le Atunuu e talanoa i le tagata fai pisinisi e faafefea ona fai nei mea? A o le a le mea ua fai ai le mea lea ? e le mai ai se isi ? ia faapena le agaga o tatou. Ae aua seiloga e faapea sei tau ia Valasi ma le Soifua Maloloina. O le tiute o tatou uma le Maota lenei o le tausisi ma vaavaai i tulaga lelei, faafetai i le Afioga i le Tamaitai le sui usufono o le Itupa i Lalo.

Sa ou matauina ananafi pei e le fiafia le sui usufono o Vaimauga ma le sui usufono o Anoamaa i le fola mai o le saunoaga matagofie a si ou tuafafine aua e te lua feita Anoamaa ma lau Afioga Tuisamau lau Fetalaiga. Ae tatau na lua ioe ma talitonu i le mea lea aumai e le itupa i Luga. E ese ma le taua leaga e iai lona tomai o ia sa tausi soifua tatau la fai ma faiaoga i le maota lenei ia le Itupa i Lalo. E tatau ona tatou talia o le fautuaga lea ma le folaina mai o lana menu, lea lea na faatino i le aso e le Failautusi o le Fono lea la ou te faafetai Tuisamau ma Anoamaa. O le tomai lea tatou te manaomia le faasoa mai faasoa mai ia tatou talitonu aua o isi tagata soifua. E le talitonu, tiga ona lauga mai lauga mai le sui ae le talitonu, pei lava o soo foi ia e le talitonu ma le motu o tagata o Iesu o le Mesia ma e pei ona saunoa ia le sui o Sagaga 3.

FOFOGA FETALAI: Ia e iai se mea ua sese i le saunoaga a le Minisita ua sei tulai mai le sui o Vaimauga 1.

Afioga SULAMANAIA FETAIAI TAUILIILI TUIVASA (Vaimauga 1): O le Minisita lenei a malele loa e fia faalogologo a le Vaimauga e faatauaina o auaunaga o itutino uma lea foi na saunoa ma faafetai foi i si ona tuafafine Minisita, a lea misi le CEO o le Vaimauga sa galue i le taimi lea. Ae leaga o lea ua taua le Vaimauga i le lauga a le sui, silafia foi o le augafaapae o lenei itu e 2 augafaapae. E 3 o le agaga la sa tuu atu ai le Vaimauga e le teena le finagalo o le augafaapae a lenei itu, ae na ou tulai atu o le leo ua tagi tagi tele lona leo. Ae leai e talia le Vaimauga ale agaga o le tuualalo ma le faaaloalo lava lau Afioga i le Fofog Fetalai.

Afioga Hon VALASI LUAPITOFANUA TOGAMAA TAFITO SELESELE: E ala ona umi la'u folasaga lau Afioga i le Fofoga Fetalai leaga o le Matagaluega lenei aemaise o le mataupu pei o le sueina o le toto poo le faamamaina ua umi ona talanoa i ai le Maota lenei. Ma e le mama la ia te au faamatalaina faapea tulai mai le sui e tetee o ia o Iesu o le Mesia a o lea la e leai, faafetai Tuisamau. E to lou pulou tasi lea sui usufono mataala, o le agaga ou te faafetai tele i le taulagalaga o le maota lenei aemaise foi o le mau a le Afioga ia Laauli poo le Minsita o Faatoaga. Leaga o le SPAGHL. Ou te faalogo mai a i tua i na vaitau e faimai o le Pako e pei e foliga e tauemu iai tagata, ae o lea ua ou manino ma malamalama e ese le taua. O le auga atoa o le faamalamalama o le Minisita o le puipuiga ia faaauau, ma ou te tatalo foi i lau Afioga i le Fofoga Fetalai e taua tele pea iai se tiute faapena poo se komiti Faapalemene ina ia mafai ona faamalosia ia tulaga. E le aoga ona tatou talanoa i nei ae leai ni pine e pei ona taua e le saunoaga a le Minisita o Tupe, faafetai i le Minisita o. E le faapea ua faapea mai le Minisita o Tupe e taofi le masini. O le auga o lana saunoaga o le lui tele lea aumai i le maota o le lui pe o afea tatou te le toe faatau ai ni masini, ae tatou te tausisi i le puipuiga o alo ma fanau i lenei vaitau ina ia oo ane i le isi 10 poo le isi 20 tausaga ua le toe iai ni masini o le sao lena o le toe faamanino mai ai o le Minisita o Tupe lona agaga. E ese lo'u fiasia ae a uma ona faatino uma masini nei e fuafua ona taofi lea o masini aua lenei vaitau sa fesiligia e nisi o sui usufono ia tua i falemai i tua o le aso 02 ma le aso 03, ina ua uma le tatou fono talu ai lea sa ou folafola foi le asiasiga e alu atu i tua ou te faafetai e leai ma se sui usufono na faatali mai i le asiasiga le aso 02 ma le aso 03 Fepuari. Matou o atu ma la'u Ofisa Sili o Pulega ma le Komiti faufautua, sa kiliva atu wheel chair ma tootoo, tofu falemai i tua aemaise Tuasivi. Aua sa iai talosaga e leai ni e tai tasi ia wheel chair na ave i Tuasivi le 15 o Wheel Chair ae tai lima uma wheel chair ma tootoo. E ala ona ou taua ia mea, a tautala le sui usufono e faatali mai a o lea mea lea ou te faiatu ai, e le tau

taua atu ni asiasiga. Aua e leai ma se sui usufono na faatali mai ona ou faapea lea, pau a la na ona faalele i le maota ae leai se faatali mai. O le isi sui usufono na inaina o Satupaitea ae lea e le o nofo mai i le le tau ma faailoa atu o le asiasiga. Ae na ou musu e tau nei tei foi ua tai foi ni sua ma ni na mea, a o le agaga o lenei Matagaluega pau le mea o le feiloai lulu lima ma faamatala nisi o faafitauli.

Lau Afioga i le Fofoga Fetalai ma le mamalu o le maota sa laga. O le tele o sui poo nisi o sui ia nai manatu i nofoa i tua o tatou itumalo i le taimi lea na matou faasavali le asiasiga. Sa fai ma le matou survey ma le faatalatalanoaga ma taitai o Falemai ia i tua. O le latou mau sa aumai, sa matou fesili tou te moomia pei ona laga e le maota ni nofoa i tatou falemai i tua? O le mea lava lea na aumai lea foi sa ou lauga atu ai faamanino atu e moomia le train lelei o le tagata i tua, e faaoagaina masini. O lona uiga le toe fausia o tane tetele tai 10 afe lita ina ia faaaoga i lea matafaioi, o se vaega faapitoa o Falemai tua mo le tausia aemaise lava o le vaavaai i tulaga pei ona matou fesiligia lea o falemai amata atu a i Lufilufi, Lalomanu, Falealili, Saanapu, pe moomia. O le latou tali e leo moomia e taitoalua tagata o Itumalo o loo iai i le taimi lena, ae o le tele o isi tagata e nonofo a i Apia sei vagana ua o atu i tua i latou e pei o mau lea na aumai matou taitai i falemai i tua. Lea ua ou faamatala atu ae o loo vaai ai pea i ai le Matagaluega, aua afai latou sailiiliga ina ia mafai ona meet le manaoga lea aemaise foi pei ona ou faamatala atu, e iai le fautuaga sa tuuina mai e le Ofisa Sili, e silasila i se mobile foi lea e alu i tua ina ia mafai ona serve ai tatou tagata nei pe taitoatasi taitoalua. Ui i lea o lea lava ua faagaioi ai fuafuaaga a le Matagalulega ae taoto mai ia tulaga e pei ona iai o nisi fautuaga, e pei ona ou fai atu, o le fuafuaga lea e pei talosaga ma faailoa mai e le sui usufono o Lefaga ma Faleaseela, o le faaaogaina o le telefoni, ia faafetai. Ae le o maua uma e tatou i tua lena service, e te fiu e google mai i Sataua e le maua, aua foi e leaga ia fesootaiga, o lea e faafofoga mai i latou aemaise foi le Minisita o Fesootaiga. E le o maua mai o i Vaisigano, o lea o lo o luelue mai le ao o le sui usufono mo Alataua sisifo, aua e sao lelei le faamatalaga lea ua fai. E matou te o i se mea maualuga e tau sue mai ai pe ou te iloa la, e le aoga lea fautauga na aumai ia Lefaga ma Faleaseela, e aoga mo Upolu. Ae ou te talitonu, e leai o faafitauli na, ae lelei lava lou alu i le falemai e pei ona saunoa le Fofoga Fetalai e vaai le fomai, ina ia mafai ona maua tulaga e pei ona i ai.

O le maliliu o lena ua uma ona faasino atu le itulau e 8 lau afioga na maliliu i lea tausaga. O le ala lea ou te faafetaia ai le Minisita sa tauavea le Matagaluega po o le Faalapotopotoga, e ese le taua o nei faamaumauga. Ma ou te tau atu i lenei Maota, a lelei ona puipui ma e alu i le masini, e i ai tagata ua ausia le 21 tausaga o faamama le toto. Se i matau la e tatou pe a faapea e leai se masini faamama toto. O lona uiga e 21 tausaga ua taumafa ua fiafia i ai ilo se i tulou. Ae silasila i le vaitau lenei, 21 tausaga, e oo i isi tagata e 15

tausaga o soifua, o lona uiga e afua mai i lou tausia lelei o lou lava soifua. Aveese lena mea, e faapea e te alu loa i le falemai faamama toto ua uma lou ola, se i tulou, e leai. O lau puipuiga i ina ia malosi, ia lelei lau silasila aemaise o le taulai e pei ona saunoa le tama matua, le saolii, ia o le Atua lava mea uma. Ae aua le faatoa oo loa ua faalogo ua to le manava, ia faatoa tautau le Atua, o le agaga taua lea.

Lau Afioga i le Fofoga Fetalai, ne i umi se folasaga, ae o le tele ia o mea e ese le taua ou te fia tau atu, ae se i sema se isi taimi, mo le tulaga o i ai le lipoti a lenei Matagaluega. Ae ou te le i nofo i lalo, ne i i ai se mea o misi.

FOFOGA FETALAI: Se i tulai mai lau afioga i le sui usufono mo Anoamaa 1.

Afioga Alaiasa Moefaauouo Malagaitutogiai Sepulona Moananu (Anoamaa 1): Sa nofonofu lava se i usi lelei le saunoaga matagofie a le afioga i le Minisita o le taitai foi ma le faaulu o le Matagaluega o le Soifua Maloloina. E tele mea ia sa tali mai ai nai manatu foi sa avatu. E faafetai tele i lau afioga, e leai o nisi mea, amuia foi tatou o lea e i ai tatou lipoti o lea lava e malamalama, ae aoga mo le faafofoga mai a le atunuu, i tulaga i mea ia e tutupu i totonu o le Matagaluega. Ia e momoli atu ai le faafetai tele.

Ou te fia maua i lau afioga, se i uma le po o ai o le falemai o Lufilufi lea na tali atu e le aoga le masini i tua, se i toe talatalanoa i ai. O lea ua amata le tatou komiti o itumalo, e tasi lea mea o le a vaavaai i ai le komiti, pe fia ni tagata o lo o aafia i totonu o le itumalo, ina ia tali ai le mea lea. Ae leaga o lea sa tuuaia fai mai ou te faatauagavale i le manatu o Aleipata Itupa...e leai o au ou te le i... e na ona pau lava le mea sa ou fia malamalama, ua leva ona galue i le falemai, ae le faasalalaua ai ana kuka ma mea ia, ae o lea pei faatoa sau i ai, ae leai se agaga faapea ou te faatauagavale i ai, ae ou te lagolagoina le tulaga o meaai ma taumafa ua...manuia lau lauga, ae faafetai i le tali mai i nisi o manaoga.

FOFOGA FETALAI: Se i tulai mai lau afioga i le sui usufono mo Aleipata Itupa i Luga.

Afioga Fuaava Suluimalo Amataga (Aleipata Itupa i Luga): E faafetai i lau afioga i le Fofoga Fetalai. E momoli atu le agaga faafetai i le afioga i le Minisita, ua manino ma malamalama le saunoaga aemaise foi o le tali mai i nisi foi o faafesili ma saunoaga i totonu o le Maota. Ae pei e tau vaavaalua le faafesili a Anoamaa 1, i le tulaga lea faapea sa i ai se fesiligia o Maota gasegase faaitumalo. O lea e taua Lufilufi faapea foi Aleipata. Ae o le mea manino, atonu e te i ua eseese so tatou faitau, ae o le tali lea a e o lo o galulue i falemai. Ae pei o le agaga na ou avatua atonu foi o lo o maua i

faamaumauga, o mai ia e agai mai, tatalo mai. E silafia foi o le falemai i Lalomanu i Aleipata, o le fale lava lea e sosoo mai ma le falemai, o lo o i ai se tasi o tamalii o le afioaga ua nofo mau lava i Apia nei ona o tulaga ia. Ua tiai foi maota ae o le latou lea augani ua toe fia oo i nuu ma afioaga e tautua. Ae ona o le taugata ma tulaga uma faapena, o lea la ne i feeseeseai le tali mai a le aufaigaluega, ona e le o latou lea e mamai. Ae manaia foi le fai o se survey mo e o lo o maua i le mai lea, ina ia faapena foi ona avatu o latou finagalo, atonu o i ina e tau paleni ai. E pei o se tulaga lea e fesoasoani atu, ae faafetai. O le isi tulaga ua e saunoa i lau asiaiga lea na agai atu ma au nofo faataavalevale, ia maumau e, pe ana ii se vea, o lea na foi e te silafia ta te feiloai lava i o i le maota gasegase i lena aso pe ana faapea e iloa. Ma le agaga faaaloalo faafetai.

FOFOGA FETALAI: Se i tulai mai lau afioga i le Minisita o Faatoaga ma Faiga Faiva.

Susuga Hon Laauli Leuatea Polataivao Fosi: E momoli le agaga faafetai i le afioga i le Taitaifono, usi foi le saunoaga aemaise le folasaga matagofie a le Minisita. Ua ou toe tulai atu lava e avatu si tuualalo mulimuli. Ona o le tulaga lava lenei, ona tatou te tuufesili pea, po o ai e faia le galuega lenei lau afioga i le Fofoga Fetalai. Na ou nofonofu lava i le taeao ma ou faalogologo i saunoaga i sui usufono, ma tuuaina ai le mea lenei o le atunuu e fiafia puupuu. Ae o aafiaga nei e tupu i le atunuu, o fuafuaga a Malo, o a fuafuaga e tapena e le Malo o meaai o meainu, o mea uma, o lea e aafia ai le soifua maloloina o tatou tagata. O le uiga o le tuualalo mulimuli lau afioga i le Fofoga Fetalai, e tatau lava ona taulamua le Malo i faalauiloa nei. O le ala foi lea o le toe saunoa o le Fofoga Fetalai. Ou te tautino atu lau afioga i le Fofoga Fetalai, o le Komiti faa-Palemene lea, na matua va ai lava le fogavaa a le Palemene ma le Faigamalo. Na faaigoa ai matou o le solo a pato, o le pato ma tamaitai pato le solo a pato, tulou lava. A o i ina na toalia uma ai taumafaiga nei, o le taumafaiga muamua lava na fai, lea na ou fai atu na o i faleaoga. Ia tapu lele, aua ne i toe i ai se tamaititi e tago i mea nei o lele. Aua ne i toe i ai ni lele i faauuga, aua ne i toe i ai ni ula lele i faauuga uma. O lea ua tatou vaai i ai, so o se faauuga lava o le atunuu, e faapenei le faulalai o ulalole i ua o tagata. Ona taofi loa polokalame nei lau afioga i le Fofoga Fetalai, ona tatou toe foi lava lea i le mea lea ua tupu i le taimi lenei. E avatu ai pea lau faamalosi i lau afioga i le Minisita, o lea ou te i totonu o le Komiti o le soifua maloloina. O se taimi avanoa tatou te savalivali mai ai i le Fofoga Fetalai, e toe faatulai le tatou Advocacy Champion Promotional Group lea a le Palemene.

A silasila mai le atunuu ua toe savali foi le Palemene i faleaoga falemai faleaiga ma so o se mea, ou te talitonu lau afioga, o le faataimuaga lena e

fesoasoani i lo tatou faamoemoe. E avatu pea le tuualalo ma le faamalosi, le Palemene e leai se isi, o tatou e tatau ona tatou tulai faatasi e foia le faafitauli lenei, ina ia puipuia ai fanau lalovaoa a Samoa. E le i taunuu le lamatia o le latou health system, i le mea lea ua aafia ai i tatou i le taimi lenei. O lau faapai atu lena ma le faaloalo.

FOFOGA FETALAI: Ia malo, faafetai saunoa i lau afioga i le Minisita. Se i tulai mai le sui usufono mo Lefaga ma Faleaseela.

Afioga Masinalupe Makesi Masinalupe: Ia faafetai i lau afioga i le Fofoga Fetalai, faamalo i lau afioga i le Minisita o Soifua Maloloina. E ui lava ina le tusia i lalo le fautuaga a Lefaga ma Faleaseela, ae aoga i isi sui usufono, aua o la e lelei lava le faagasologa...o le uiga foi lea o telefoni o le tatou iloa ai o mea o la e tutupu i le lalolagi. Ae o lea ua e saunoa, ia faafetai o le mea sili ma le taua o lea ua manino foi lea vaega. O lau faafetai e pei ona ou momoli atu ona o le tulaga e pei ona sa ou talosagaina ai sau taavale, wheelchair. O lea sa ou oo atu ma maua le wheelchair a le faifeau lea ua malolo. A o lea ua maua o lea sa alu atu le asiasiga, o lona uiga e le agavaa a la i ai Lefaga ma Faleaseela i wheelchair aua e leai se falemai. Ae o lea ou te tautino atu i lau afioga, aua e pei ona ou saunoa ou te alu e sue se fanua.

O lea ua maua le fanua e fai ai le falemai a Lefaga ma Faleaseela, e lima eka lea ua foai mai e faatino ai, atonu o le a maua ai se avanoa lelei e faasafua atu ai le tulaga uma i mea e manaomia mo le faagasologa. Afai e te finagalo a leai lava se falemai i le taimi nei, ia avatu se ambulance e tutu i tua a maua lava se mai ma aumai i le falemai, e faatalitali ai le uma ona fai o le falemai. Manuia le Fono.

FOFOGA FETALAI: Ia tulai mai lau afioga i le Minisita e faamaea mai lau saunoaga.

Afioga Hon VALASI LUAPITOFANUA TOGAMAGA TAFITO SELESELE: Faafetai i lau afioga i le Fofoga Fetalai, o le taua ia o le tuualalo, aemaise le afioga i le sui usufono o Anoamaa 1, ma le afioga i le sui usufono mo le Aleipata Itupa i Luga. E pau lava le mea ou te faamalo i lo oulua tuufesili po o ai sa tali mai ia te au. O le mea moni lava, aua a tuu atu lua te sailia e iu ina faasala nai fomai i totonu o le nuu. Ae o sailiiliga ia, e le o ni sailiiliga e faapea ua...o ni fesili e faataua ai ia matou le manaoga aemaise o tulaga ia matou. Ae le faapea o le a taofia ai fuafuaga. Ae taua tele... a e o tamaitai lava o lo o taua o Nurse Manager i tua, i o tatou falemai, lea e aumaia faamatalaga. Ae aua e te lua limatete i tamaitai tausii soifua, o lo o tuu mai lava le tali o lo o fia faamaopopo mai, i tulaga e pei ona i ai.

Lau afioga i le Minisita, e taua tele le tuualalo, e pei ona ou fai atu, amata atu i le Maota lenei ia pulega lelei ma mea lelei ma faatupu lagona lelei i le tatou atunuu aemaise tulaga e pei ona i ai. Ua faamauina le fautuaga. Lau afioga i le sui usufono o Lefaga ma Faleaseela, o le mea lava lea ou te tuu ai i le sui usufono fai mea ita, e sau lava le tali e pei e ita. A o le agaga, e faafefea ona avatu ni wheelchair, pe afai, e avatu na o le fanua la ua tau mai ...e leai se falemai. Ae onosai e oo lava ia te au e le i oo atu i ai se tusi o le tou falemai. Ae ua uma ona fautuaina, avatu le tusi saina atu ai alii ma faipule ma lau afioga i le tofi. O faaupuga lava na o lo o ave ia latou o lo o talosaga mai. O le taumafai foi e avatu se ambulance e tutu i ina, ou te talitonu ai seiloga e faapea ua leaga le ulu o le CEO po o le Minisita, ona fai lea o ni mea faapena. Ae aua e te popole, taatia mai lou faamoemoega ma lou faatuatuaga i le agaga o lo o tatou taumafai e tatou te talanoa i le lipoti o le 2019/2020 ae le o se tala o le tupe ina ia faamanino ai tulaga uma. E i ai se taimi ona faamanino lea o lena tulaga.

Lau afioga i le Fofoga Fetalai, e faamalulu atu, e ala ona umi se tautalaga e toeititi Palemene atoa o lauga i le taua o lenei lipoti. E faamulimuli sau tala ou te faafetai i le afioga i le Taitaifono, Komiti faafoe, aemaise o le Pulega i lau susuga i le Ofisa Sili, o faafofoga mai, lau susuga Mulipola aemaise o le lagolagosua a le CEO i lea foi matata le susuga i le Laau na Fausia ma le Matagaluega i ona vaega uma, ae le gata i lea o le Susuga i le Fomai ia Ben Matalavea o lo o siimai i Niu Sila. O le tatalo, ia toe foi manuia mai ia faafoi e le Atua lou soifua laulelei aemaise tulaga uma.

Ia, e momoli foi le faafetai i le Afioga ia Faimalo e ou le Lipoti lenei, ia, o le ta Lipoti, o lea ua ta talanoa faatasi i ai ma avatu i luma o le Palemene. O a ni faaletonu o lenei taeao e ala i mau a le Minisita ma le Komiti, ia e faamalulu atu, e poto lava le tautai, ae le atoa atu i liu o lona sa. Ia manuia Samoa, manuia lau Afioga i le Fofoga Fetalai. Manuia le Maota. Faafetai.

FOFOGA FETALAI: Malo saunoa, faafetai foi malele i lau Afioga i le Minisita o le Soifua Maloloina. Ia, e pei lava ona e saunoa, sala i le saausi felafolafoaiga ma saunoaga a le Palemene i lenei lava tulaga o le tatou soifua maloloina, le faamamaina o toto se i tulou le faafogafoga mai a le atunuu ma le Maota, ae malo faafetai. E tele foi finagalo faaalua ona o le faamoemoe lava ina ia tuutiitia ia lelei le tulaga o lo o i ai si o tatou atunuu i lenei vaitaimi. O le mea lea malo faafetai. Ia, ua oo foi saunoaga a nisi o Minisita i le tatou Komiti Faapitoa lea o le SPAGHL, o lea ua faamau i i le tatou Fonotaga. E i ai le tatou semina lea e fai ia Me, o i ina o le a tatou talanoaina ai tatou Komiti Faapitoa ia, aemaise lava le taumafai o le soifua maloloina lautele o le atunuu, aua lava le fesoasoani mo le agai i luma. Ae faafetai mo le fautuaga o lea ua faamauina foi e le Failautusi ma le tatou Ofisa aua le tatou agaigai atu i luma i le tatou galuega. O le mea lea, malo faafetai.

Ou te tapa lau Afioga i le Taitaifono mo le lafo.

Afioga LAUMATIAMANU RINGO M. PURCELL: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le P.P.2022/2023 Nu.35, Lipoti a le Komiti o le Vaega Tau le Va Fealoai i le P.P.2020/2021 Nu.63, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2019/2020.*

Faaluaina e le sui usufono mo Vaisigano 1, sui usufono mo Aana Alofi 1 ma le sui usufono mo Aana Alofi 3.

Na faamaonia le lafo.

FOFOGA FETALAI: Ou te tapa lau Afioga i le Minisita mo le Lafo a le tatou Malo.

Afioga Hon VALASI LUAPITOFANUA TOOGAMAGA TAFITO SELESELE: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao Tali a le Malo i Fautuaga a le Lipoti a le Komiti o le Vaega Tau le Va Fealoai e pei ona ou tolaulauina.*

Faaluaina e le Minisita mo Galuega, Felauaiga ma Atinae Eseese ma le Minisita mo Leoleo ma Falepuipui, Pulega o Tinei Mu ma Faalavelave Tutupu Faafuasei.

Na faamaonia le Tali a le Malo.

P.P.2022/2023 NU.36, LIPOTI A LE KOMITI O LE VAEGA TAU LE VA FEALOA I LE P.P.2020/2021 NU.98 MA LE P.P.2021/2022 NU.53, LIPOTI FAALETAUSAGA A LE IUNIVESITE AOAO O SAMOA MO TAUSAGA FAALETUPE 2019/2020 & 2020/2021

P.P.2022/2023 NU.84, TALI A LE MALO I LE P.P.2022/2023 NU.36, LIPOTI A LE KOMITI O LE VAEGA TAU LE VA FEALOA I LE P.P.2020/2021 NU.98 MA LE P.P.2021/2022 NU.53, LIPOTI FAALETAUSAGA A LE IUNIVESITE AOAO O SAMOA MO TAUSAGA FAALETUPE 2019/2020 & 2020/2021 - ILOILOGA

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Va Fealoai.

Afioga LAUMATIAMANU RINGO M. PURCELL: Lau Afioga i le Fofoga Fetalai ou te faatu le lafo, *Ina ia faautagia e le Fono Aoa le Lipoti a le Komiti o le Vaega Tau le Va Fealoai o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Vaisigano 1, sui usufono mo Aana Alofi 1 ma le sui usufono mo Aana Alofi 3.

Na faamaonia le lafo.

FOFOGA FETALAI: Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Afioga LAUMATIAMANU RINGO M. PURCELL: Lau Afioga i le Fofoga Fetalai e ia te au le ava ou te tulai ai i le tulaga faale-Taitaifono o le Komiti e folasia le aotelega o lana Lipoti ma ana Sailiiliga i le P.P.2020/2021 Nu.98, Lipoti Faaletausaga a le Iunivesite Aoa o Samoa mo le Tausaga Faaletupe 2019/2020 & P.P.2021/2022 Nu.53, Lipoti Faaletausaga a le Iunivesite Aoa o Samoa mo le Tausaga Faaletupe 2020/2021.

Muamua, na amatalia iloiloga a le Komiti i le aso 6 Iulai 2022 i le faatalanoaina o le Lipoti a le Iunivesite Aoa o Samoa. Na auai le afioga i le Laau na Fausia a o avea ma Pule Sili o le Iunivesite ma le Pulega e folasia aotelega o galuega faatino i le tausaga faaletupe e lua, o le 2019/2020 ma le 2020/2021.

Aotelega o Sailiiliga:

Lau Afioga i le Fofoga Fetalai ma le paia maualuga o lenei Maota aemaise le tapuaiga a le atunuu, o le Iunivesite na faatuina i le 1984, ma sa tuu faatasia ma le fuaiala o faiva alofilima po o le Polytechnic ina ua teuteu lana Tulafono i le 2006. O le vaaiga tulaui a le Iunivesite ua faapea mai, o se Iunivesite tulaga sili, e ola ma amata i saililiga i mataupu tau Samoa ma tulaga maualuga o le aoaoina ma le aoao atu e tali atu i manaoga tau atinae o le atunuu. Ae fai mai lana manulauti, o le tuuina po o le afua atu ai o tagata, aoga faauu mai vaega uma o aoaoga e tali atu i manaoga o le atunuu mo punaoa tau tagata.

Na faamauina e le Komiti galuega faatino na ausia aemaise o nisi o galuega sa fetuunai ona o luitau e le o toe po malae i tausaga faaletupe sa iloiloaina, na feagai le lalolagi ma le faamai o le Koviti-19. E ui i le faafaigata e le Iunivesite ona faatautaia aoaoga mo fanau aoga, ae sa maitauina i saililiga ma ua faamauina i le Lipoti a le Komiti le faaauuina pea o galuega a le Iunivesite e faaogaina ai le tomai faaneionapo i luga o upegatafailagi.

Faamatalaga o tupe a le Iunivesite

E tusa ai ma le Lipoti a le Ofisa o Pule ma Suetusi Sili i Faamatalaga o Tupe a le Iunivesite ua faamauina ai e \$23.8 miliona tupe maua a le Iunivesite mo le tausaga faaletupe 2019/2020. Na siitia ana tupe maua i le \$6.4 miliona pe a faatusa i le \$30.3. miliona tupe aoina mo le tausaga faaletupe 2020/2021. O tupe faaalu mo le tausaga faaletupe 2019/2020 e \$26.2 miliona. Ma e \$28.1 miliona tupe faaogaina mo le tausaga faaletupe 2020/2021.

Asiasiga a le Komiti

Lau Afioga i le Fofoga Fetalai, na maua le avanoa e faatautaia ai le asiasiga a le Komiti e pei ona faamauina i lana Lipoti i lala o le Iunivesite, i aoga o aoaoga faale-gataifale i Mulinuu, aoga faa-fomai i Motootua ma le nofoaga autu i le Papaigalagala.

E pei ona faamauina i le Lipoti, o Saililiga a le Komiti, o le atoaga o itu na maitauina e le Komiti i lana asiasiga, ma e faafetaia ai le Iunivesite i le faatupulaia o aoaoga ma polokalame ua aotauina ai fanau o si o tatou atunuu. E le gata i lea, a o le pitolaau a faiaoga ma le afaigaluega lagolagosua i auaunaga tuuina atu mo le manuia o fanau. Ua faamalo fai o le faiva.

1. O itu taua na maitauina e le Komiti, muamua, o poloketi a le Iunivesite.

Lau Afioga i le Fofoga Fetalai sa molimauina nisi o poloketi a le Iunivesite, ma o nisi o ia atinae na faatupeina i tupe faasao, aemaise foi o le lagolagosua mai o le atunuu lautele, ae le faagaloina le fesoasoani mai o paaga i atunuu i fafo, aemaise o Samoa nei.

2. Totogiina o pili aoga.

O le totogiina o pili aoga i le tausaga faaletupe lena 2019/2020 ma le 2020/2021, na tuuavana le Iunivesite i le piriota mo le totogiina o pili aoga, ae le gata i lea sa maua avanoa faasikolasipi, local ma partials mo fanau aoga.

3. Lala o le aoga i Savaii.

Na faamauina i taimi o le iloiloga le faagasolo o fuafuaga mo le atinae o le lala i Savaii. O se itu e manatu le Komiti e ao ona faagaoioi ina ia faatumauiina pea le aumau o fanau i Puleono e aoga mai ai.

4. Aloaia o le Iunivesite i Atunuu i fafo.

Lau Afioga i le Fofoga Fetalai, o se tasi itu na laga e le Komiti o le amanaia o nisi o faailoga taualoa, BA, BCOM ma isi i atunuu i fafo. E moni ua resitalaina nisi o polokalame a le Iunivesite e aofia ai aoga tau matata eseese

ma nisi polokalame faa-tikeri, ae manatu le Komiti e ao ona silasila i le mafai ona amanaia o faailoga taualoa ma nisi o tikeri i atunuu i fafo.

Ona see mai lea i fautuaga a le Komiti. I le maea ai o iloilogaga a le Komiti ma na fautuaina ai e le Komiti le Malo e faapea:

Fautuaga 1:

E fautuaina e le Komiti le Malo mo le fausiaina o se faleaoga foi mo Aoga Faafomai i Motootua ona ua vaapiapi ma le lava potu o lo o faaaogaina mo le aotauina ai o fanau e avea ma fomai i le lumanai.

Fautuaga 2:

E fautuaina e le Komiti le Matgaluega o Alamanuia ma Leipa ina ia mataituina pisinisi tumaoti ina ia faamatuu mai ma unaia alo ma fanau o le atunuu o lo o naunau ina ia faalauteleina le tomai ma le agavaa i aoga matata eseese.

Fautuaga 3:

E fautuaina e le Komiti le Iunivesite Aoao o Samoa ina ia silasila i le faaaauaina o le resitalaina o aoaoga ma polokalame i le Pulega o Faailoga ma Tusipasi Taualoa ina ia tagai i le amanaia o nisi o ana faailoga i atunuu i fafo.

Iugafono:

Na faaiugafonoina e le Komiti Faa-Palemene o le Vaega Tau le Va Fealoai, ina ia fautuaina le Fono Aoao Faitulafono ina ia faamaonia ma faautagia lana Lipoti ma Fautuaga i le: *P.P.2020/2021 Nu.98, Lipoti Faaletausaga a le Iunivesite Aoao o Samoa mo le tausaga faaletupe 2019/2020 ma le P.P.2021/2022 Nu.53, Lipoti Faaletausaga a le Iunivesite Aoao a Samoa mo le tausaga faaletupe 2020/2021.*

Ma le faaaloalo lau Afioga.

FOFOGA FETALAI: Malo faafetai i lau Afioga i le Taitaifono e tusa o le tolaulauina o Sailiiliga aemaise foi o Fautuaga a la outou Komiti. O le mea lea, malo faafetai mo le galuega.

Ou te tapa lau Afioga i le Minisita o le tatou Iunivesite, Honorable Seuula Ioane mo le tolaulauina o le Tali a le tatou Malo.

Afioga Hon SEUULA IOANE (Minisita o le Iunivesite Aoao o Samoa):

Ou te tulai atu ma le migao ma le ava ma le faaaloalo tele e solituina ai leni aofia aemaise o le Palemene mamalu vaeane le afio mai o lau Afioga i le Taitai o le Palemene, aemaise lou ofisa ma vaega eseese o leni fonotaga.

Ae le i tali atu Tali a le Malo, ou te manatu o lea ua uma ona pae tia o le tautiaga, o le a ou faaaloalo foi iai ma ou te le toe aloina le ogavasa. E manumanu i le tatou taimi na ona ou afe ane a i tatou malo faaaloaloga i le tapuai faaaloalo mai o sui mai o tatou atunuu i fafo ua mafai ona auai i le tatou fonotaga i lenei aso, malo le tapuai, malo le fsoasoani mai i le fonotaga a le tatou atunuu. Faapena foi ona ou afe atu i tatou aiga ma malo i atunuu mamao o loo i totonu o Samoa i lenei vaiata, o loo asiasi foi latou ona o latou fonotaga faale-ekalesia aemaise foi o le asia o aiga o nai uso tuafafine ma aiga ona o tiute faaleaiga ma faalavelavae malo le tauatai malo le tapuai

TALI A LE MALO

O le a faamauina le fautuaga ae mo le silafia i le:

Fautuaga 1.

O le fausiaina o se faleaoga lelei e aoga ai alo ma fanau o loo aoaoina mo le tatou vaega lea faafomai. I le taimi nei o lea ua faagasolo le poloketi lenei o faatupeina e le Malo o Iapani. O le agaga autu ina ia fau se fale fogafaletolu ma o lena fale mo le Iunivesite Aoao Samoa e faamautu ai aoaoga mataupu tau faafomai. O lea foi iai le saofaiga faasoifua maloloina poo le Faculty of Health Science. O se potu e aoaoina ai le tomai faatausimai aemaise o se potu tusi poo se library faaneionopo e fesoasoani e saili ai le tofa ma le uta a le au aoga aua le aoaoina o latou. Ua iai foi la le manatu e faatuina lenei fale i le ogatotonu o le Papaigalagala ona o si vaiiti lea e i ai le aoga i le taimi lenei ua manatu foi le Ofisa o le Soifua Maloloina e iai foi so latou fuafuaga e faaoga iai lea oga eleele.

Fautuaga 2.

Fautuaina e le Komiti Matagaluega o Alamanuia ma Leipa ina ia mataituina pisinisi tumaoti ina ia faamatuu mai ma unaia alo ma fanau o le atunuu, o loo naunau ina ia faalateleina le tomai ma le agavaa matata eseese. O lea ua faamauina le fautuaga faafetai tele lava ae mo le silafia o loo faaauau pea faiga faapaaga masani a le Iunivesite Aoao o Samoa ma le Matagaluega o Alamanuia ma Leipa. E ala i le faatinoina o le polokalame faaaperenitisi a Samoa. O le tausaga lenei e pei ona iai le ripoti ua atoa iai le 50 tausaga talu ona faatinoina lenei polokalame faaaperenitisi, mai le 72 o lea amatalia o lea ua amatalia i le aso 13 Iulai 2022 le ofoina atu o le polokalame fou faaperenitisi i Samoa i le tusipasi Nu 3 ma le tusipasi Nu 4 i matata e 7 e aofia Inisinia Taavale, Faakamuta, Faeletise, Inisinia o Masini, Palama, Lipeaina o Aisa ma Ea Malulu faapea le Soo Uamea. O le Totogiina o Pili mo le polokalame Faaperenitisi e 50% e totogi e le Matagaluega o Alamanuia ma Leipa 30% e totogi e le fale faigaluega ma le 20% e totogi lava e le tama poo le teine aoga. O se tasi lea o mafuaaga sa faaali e nisi o

fai pisinisi tumaoti e faafaigata ai ia i latou ona uunai mai uma latou aufaigaluega i le polokalame lenei. Peitai e le o malolo le Matagaluega ma le Iunivesite ina ia uunaia pea faigaluega ina ia faaaoga polokalame eseese o loo ofoina atu e le tatou Iunivesite Aoao.

Fautuaga 3

Fautuaina le Komiti le Iunivesite Aoao Samoa ina ia silasila o le faaaauuina o le restalaina o aoaoga ma polokalame i le Pulega o Faailoga ma Tusipasi taualoa, ma ia tagai i le amanaia o nisi o ana faailoga i atunuu i fafo. Ua faamauina foi lea fautuaga taua o le taimi lenei o le faafou i tausaga taitasi le resitala mo aoga faaaauu i le tatou Pulega o Faailoga ma Tusipasi taualoa a Samoa. E aofia ai ma le Iunivesite Aoao o Samoa. O Ianuari 20 na amata ai le faiga faapaaga a le Iunivesite Aoao o Samoa ma le Pulega o Faailoga ma Tusipasi aloaia a Samoa, i le uunaia lea o le resitalaina uma o polokalame eseese e 104 o le tatou Iunivesite i luga o le faavaa o tusipasi ma faailoga aloaia o Samoa.

Lau Afioga i le Fofoga Fetalai ma le mamalu o le Fonotaga, o lenei taimi e 37 polokalame e tusa lea ma le 35.6% ua maea ona faamauina aloaia i se tulaga tumatie accredit e le SQA. E 15 polokalame poo le 14.4% o loo galulue pulega o faailoga ma tusipasi taualoa i le taimi lenei ae 48 polokalame poo le 46% o loo faasolo malie mo lea faamoemoe. O loo iai le faanaunautaiga o le Pulega o le Iunivesite Aoao o Samoa e tataua ona oo atu i le faaiuga o le tausaga e 2024, ua oo atu le tatou numera i le 70% le aofai o polokalame a le Iunivesite Aoao ua maea ona accredit e le SQA. O le taimi nei ua amata ona amanaia ma aloaia i totonu o Iunivesite i Niu Sila, Ausetalia ma Europa, Amelika i latou e faimalaga atu ma latou tikeri, tusipasi mai lo tatou Iunivesite Aoao o Samoa o le tatou faailoaga o le Matuaofaiva i le Mataupu tau atinae ua maea ona faamauina aloaia i se tulaga tumatie (accredit) e le Faalapotopotoga o Europa mo aoaoga ma sailiiliga mataupu tau atinae. O a tatou tama fanau sa aotauina foi i matata eseese o loo faafaigaluega i Niu Sila ma Ausetalia.

Lau Afioga i le Fofoga Fetalai, ou te momoli le faamalo ma le faafetai i le Taitai o le Komiti aemaise o le Komiti mamalu ona o la latou sailiiliga ma la latou sutesuega. Ou te talitonu i le tagofia ai e le Palemene o lenei mataupu tele, o le tatou iloiloa lea ma mataitu o nisi o aseta taua a le tatou malo. E ao ona oo iai le silafia ua le gata lenei Palemene ao tatou tagata. E faapena foi tagata faigaluega aea le tapuai mai o tatou aiga ma nuu aemaise o tagata lautele o le atunuu. E ao ona latou silafia mataupu tuga faapenei aua le agai i luma o le tatou Malo. Lau Afioga i le Fofoga Fetalai o le tali atu lea a le Malo ma le agaga faaaloalo faafetai tele.

FOFOGA FETALAI: Malo saunoa faafetai foi lau Afioga i le Minisita mo le folasia malamalama o Tali o le Tatou Malo aua foi fautuaga ma sailiiliga a le Komiti, o le avanoa lenei mo se tasi o sui fia saunoa o le tatou maota sei tulai mai le sui o Faasaleleaga 5.

Afioga PESETA VAIFOU TEVAGAENA (Faasaleleaga 5): Faafetai i lau Afioga i le Fofoga Fetalai. E momoli foi le faamalo ma le faafetai i lau Afioga i le Minisita, faafetai foi i lenei lipoti ua faafofoga foi le maota. E maualuga foi se faafetai i le Afioga foi i le Laaunafausia, i lona foi taimi lea e afua mai ai lenei lipoti i le tele o lenei seleni sa faapea ona auina mai ao galue foi le Afioga i le Laaunafausia i le tatou Iunivesite. Lau Afioga i le Fofoga Fetalai, e momoli lau faafetai i fuafuaga lea ua faataatia e le tatou Faigamalo. I le tulaga lea e pei ona aumai ai le Lipoti a le Komiti e uiga i sei isi Falemai e fausia i Motootua. Aua e tasi foi lenei mataupu e masani ona ou lagaina i le taimi i fonotaga i le tala o le tupe ma o se tulaga e taua tele i lou nei sui ma e atonu foi o lea falemai o lea mafai ai ona ausia ia tulaga tau standard a lea atunuu ma lea atunuu ma lea atunuu. Aua o le mea moni lava i le tulaga lea o loo iai lo tatou polokalame foi lea faaaperenitisi faamatata eseese i le tatou Iunivesite. E tele lava e le o ausia ia standard a isi atunuu ae momoli lau faafetai i le Malo o Ausetalia i le latou fesoasoani lea ua mafai ai ona fesoasoani mai i lenei polokalame aua alo ma fanau aoaoina o si tatou atunuu. Ae o le agaga lava o lou tulai atu sei toe silasila ane lava lau Afioga i le Minisita. Ona e moi lava o lea ua faauuina ma iuina mai ia nisi o alo ma fanau e ala i tusipasi ma faailoga i taimi sa aoaoina ai i tulaga tau tomai faapitoa poo skills i tulaga faamatata eseese. O le mea moni lava o lea o loo tulaga lelei tulaga faaaoaoina ae pau a si lave ma si tulaga foi lea tau avatu ai se tuualalo o le faatinoina aua o le mea moni lava o le tele o alo ma fanau lea ua omai ma le tomai aoaoina ae oo mai loa i luga o galuega saili galuega e galulue ai, e matua le taitai lava talafeagai. O lona uiga o se tuualalo ia pe mafai ona toe talosagaina le Malo o Ausetalia i nai nisi vaega e fesoasoani ai ina ia mafai ai ona auina mai nisi foi o i latou o iai le tomai faapitoa i le faatinoina o nei galuega ma nei tomai faapitoa. Aua e ese lava le omai o alo ma fanau ma le tusipasi a o le faatinoina i luga o le field e matua le taitai a ona ausia e alo ma fanau. E tasi lea vaega o loo taumafai ai nisi o kamupani i tua ina ia toe taumafai e faalauteleina atu le aoaoina o le tomai lea i alo ma fanau. Ae pei o se talosaga foi lea ina ia uma mai le aoga a le tama ma le teine o la ua atoa ia te ia le tomai e le gata foi i le tomai ua na silafia a o le aoaoina i le puipuiga o le saogalemu e faatino ai matafaioi. Ae silasila foi se tasi o faasalalauga foi sa tatou faalogologo sa faaali foi se tasi o sui o lenei maota sona le fiafia, ona o nisi faasalalauga mai le tasi foi o motu i sasae. I tulaga foi nei o tausii soifua sa moomia ai i avanoa tausii soifua e le malo, tatou motu lea i sasae lea sa aumai sao lava, e le faaaogaina ia a tatou tausii

soifua i si tatou atunuu ona e le o ausia i tatou ia standard i ia foi faigamalo lea sa ou talosagaina ai le Afioga i le Minisita o le Soifua Maloloina. Faafetai o lea ua maua le avanoa aua o lea ua foliga mai o le a fausia le falemai lea aua lea iai le tatou OUM. O lona uiga o lea la maua ai se fesoasoani atonu o le a mafai ona fesoasoani i le tulaga lea, ina ia mafai ai ona tele nisi le gata i nisi atunuu o le a faalatele ai le tomai i lea auunaga o loo feagai ma si tatou atunuu. E pei o se tulaga lea lau Afioga i le Fofoga Fetalai, na o se tuualalo atu lava lau Afioga i le Minisita e toe silasila iai ma lou faaaloalo lava

FOFOGA FETALAI: Malo faafetai saunoa, tulai mai le sui usufono mo Safata 1.

Afioga LEANA RONNIE POSINI: E faafetai tele i lau afioga i le Fofoga Fetalai, maua foi so matou avanoa e faaali ai so matou manatu. E muamua ona momoli le agaga faafetai tele i le afioga i le Minisita i le tali mai i lipoti faaletausaga a le tatou Iunivesite. E faafetai tele foi i le Taitaifono i le latou sailiiliga. E muamua ona faafetai tele i le Pulega a le Iunivesite, i le aoaoina o alo ma fanau a lo tatou atunuu. E faamalo foi, o lea ua maua ua i ai le ua seei mai e fai ma pule o le tatou Iunivesite, manuia lou alofaiva i tulaga o le tatou Iunivesite. Ae momoli le faafetai tele ona o lea ua tatou silafia o mea ia aoaoga ma tulaga o le soifua maloloina, e le o se mea e ono maua ai ni tatou tupe, o tatou tupe e faaalu, aua o i lea e ave i ai a tatou tupe, aemaise lava le tulaga o aoaoga. E ave e le tatou Malo ia tupe i le aotauina o alo ma fanau, ona fua mai lea, e seei e tautua lo tatou Malo. O lea ou te faalogologo atu, o le tele ia o le sao o le tatou Malo i le tulaga o le faiga o le aoaoina o le tatou Iunivesite.

Lau afioga i le Fofoga Fetalai, e au foi le taofi i le tulaga o polokalame ia, e pei o le fale lea ua taua o le fale mo fomai, e iai lau tatalo ou te lagoalagoina tele. E le gata i lea, o le tatou Iunivesite e silasila ifo i nisi polokalame fou, o polokalame e ono manaomia i totonu o lo tatou atunuu, e ave e sailiili lelei ai le tatou Iunivesite aemaise o e ua i ai le poto faapitoa i le tulaga o nisi polokalame fou. O tulaga ia, o le mea lea o lea na taua e isi sui usufono o Faasaleleaga 5, o aoga ia faa-Matataeseese. Ou te talitonu e tasi lea poutu toa o le atinae o le tatou atunuu, o galuega faamatata. A o lau foi lea faitau e leaga lava lea matata e taugata, leaga e le gata i le aoaoina o le mafaufau ae o le faatinoga. E pei o le taimi la e faatino ai, o le tele ia o le tupe e manaomia e faatino ai, a tatou naunau foi e tulai mai tama fanau ua uma ona aotauina ia tele se tatou tupe e faaalu i matata ia. E le gata foi i lea a silasila foi, o lea ou te tau matau o tausaga ia talu na amata mai, o matata lava ia o lea e i ai. A o lau lea faitau, ua tataua ona i ai nisi matata e toe faaopoopo. O le uiga lea o lea ou te matau atu o le lipoti lea e galulue faatasi le tatou

Iunivesite ma le MCIL, e sao lelei lava lau afioga. E leaga o le MCIL latou e o i tua i falefaigaluega. E saili mai tomiai, ma agavaa latou te autilotilo po o fea le mea e tataua ona faalelei. E aumai le lipoti o falefaigaluega, o matou e manaomia le toe faaleleia o tatou tagata e o e fai electronics ma mea faapena. Ona ave lea o le fautuaga a le MCIL i le Iunivesite ona amata lea ona faatalanoa. E faatalanoa faatalanoa maua lena polokalame, o le polokalame lea o le polokalame masani lava e faigaluega ma aoaoina.

I lau lea faitau, ua tataua ona toe faateleina le tulaga i nisi matata. Ou te faafetai tele i le Faalapotopotoga lea o le SQA, faafetai i lo outou lava le tou fesootaiga ma le tatou Iunivesite, e o e fai le polokalame e o e accredited polokalame ia. Aua o lea e iloa lelei lava, o le SQA o lo o galulue ma Niu Sila ma isi atunuu i fafo i mea ia o tusipasi ma faailoga. A le accredit ina la e le SQA ia polokalame ia a le tatou Iunivesite, e i ai foi taimi e le amanaia mai ai i fafo. Ou te talitonu o le agaga faamalosi lea i le tatou SQA ae le gata i lea o tatou aoga maualuluga uma ia, e accredit tatou polokalame ina ia lava ma amanaia e atunuu mamao. Aua o lea tatou te iloa lava, e tele tatou tama fanau. E oo i tatou galuega faavaitaimi ia, o lea ua i ai tatou kamuta i Niu sila ona o lea e amanaia tatou tusipasi.

E i ai lou talitonuga e avatu le faamalosi, i le tatou Iunivesite. Lau afioga i le Minisita, e i ai foi lou talitonuga se i silasila ifo lau afioga pe le ua oo foi i le vaiata, aua o lea sa faitau o lea sa tuu faatasi i le 2006 ia le tatou Iunivesite ma le Matataeseese, o lau faitau o le a savalivali i le luasefulu tausaga. Pe le o toe silasila totoa lau afioga i le tulaga e toe tuueseese ai ia aoaoga ia. Aua e i ai lou manatu e i ai le mea na ou tau matau i le isi taimi, ina ua tuu faatasi. O se fuafuaga lelei ma talafeagai. E i ai le taimi na ou tau matau atu, a iu mai tamaiti i le Vasega 13, a o lea ua tuu faatasi i le pulega lea e tasi, e o atu lava tamaiti fia o i le polokalame a le Iunivesite, ae pei ni toega ua le gafatia lava, ona o loa lea faatoa ave le Matata eseese. A o le tulaga sa i ai isi taimi i le tausaga ua mavae, e i ai tamaiti na pasi i le UPY na o e sikolasipi ae na fia o lava i le Matata eseese, ae o tamaiti lea na iloga lava le tulai mai, toe o foi toe oso atu i le auala lea toe o fai o latou bachelor of engineering. A o tamaiti ia, o le matua lelei lava o le latou background ona o la sa galulue e faatino faatoa o ai lea i fafo. O le mea lea pei e tau fefiloi tamaiti, e pei ua o atu lava tamaiti ia e fia agai i aoga faa-Iunivesite, e pei na o le tusitusi lava, ae pei ua mumusu tatou i galuega palapala. Ae i ai lou talitonuga silasila totoa lau afioga i le Minisita, pe le i toe oo i se taimi e tuueseese ai. Ou te le talanoa i mea tau tupe, ae ou te iloa a sau le tala o le tupe, e pei e sapaui atoa tupe ia e alu i totonu o le Iunivesite. E pei lava ona ou fai atu, e moni lava o la e maioio ae i ai lava nai eseese e pei ona i ai muamua.

O nai manatu ia e avatu i lau afioga i le Minisita e ala atu i le Fofoga Fetalaia. Ma le agaga faaaloalo faafetai.

FOFOGA FETALAI: Ia malo faafetai. Tulai mai le sui usufono mo Salega 1.

Afioga FEPULEAI FAASAVALU FAIMATA SU'A: E faafetai mo le avanoa i lau afioga i le Fofoga Fetalai, e maua ai se avanoa o lenei usugafono e fesoasoani atu ai aua le lipoti a le Komiti mamalu. Ou te faatauaina le fautuaga 2, ina ia faalauteleina le tomai le agavaa o aoga faamatata eseese. O le isi lea vaega o lau fesoasoani ua maua i le fesoasoani i le sui usufono mai Safata. Ae o le aotelega o se tuualalo ma se fesoasoani i lau afioga i le Minisita. O lea ou te manatua a o Minisita o Aoga ia le afioga i le Sao Faapito a o pule ia Magele Mauiliu i le Matata Eseese, sa faavaeina loa i le 1993, sui ai loa le igoa o le aoga i le TTI i le Samoa Polytecnic. E mai lea taimi e oo mai le 2006 ae le i tuufaatasia, sa tele ina tolu tausaga sa ave ai mataupu ia faamatata eseese, tulaaa faainisia, kamuta palama mea tau electronics, o matata uma lava e oo lava i le failautusi. Ae sa iu mai foi tamaiti i le taimi lea, o le lava ia o le tomai aoaoina.

E fai lau tala lau afioga i le Fofoga Fetalai, faafofoga foi le Minisita, o le lava o le aoaoina i totonu o le potuaoga i le tamaititi aoga, e na te silafia uma ai totoga o le masini. Faataitaiga o le taavale, e silafia uma lava totoga o le taavale, a mai foi pe gasegase le taavale na te iloa lelei lava, o le aoaoga lea i luga o le api aoga. A ta tau matauina mai le isi ono i le 70% ae faalava mai i le isi field lea e i tua, e gaoioi ai. Aepeitai lau afioga i le Minisita ua tele le suiga i le taimi lenei i le vaai a lenei itumalo. Ua taitasi, tailua, pe ua le atoa foi le tailua tausaga. O le mea lea ua tupu ua agai mai loa fanau, ua le maua e le tamaititi aoga e faaauau ai le matata lea na aoga ai. E sau loa i tua e maua le avanoa e alu ai i galuega faavaitaimi, oso loa i i e vave. E tiai atoa lava le taimi ma tausaga na naunau ai matua e totogi le pili ma tigaina ai le Malo e totogi le faiaoga ua leai se naunau, aisea? E le o lava le taimi e aoaoina ai fanau, ina ia faamausali ai le loto ma le mafaufau o le tamaititi aoga i lana matata lea.

O le ala lea o se tuualalo, toe silasila totoa i le vaega lea, e pei ona maua i le sui usufono o Safata, pe le alagatatau ona toe vaveese le vaega lea. E leaga o le saunoaga lea na ou faalogo ai i le Minisita i lenei taimi, le suiga o le igoa mai le TTI mai le Polytecnic, o le suia foi lea o le tulaga na maualuga o le aoga, na ou faamaonia e au ia i lea taimi. A o le taimi lenei ua tele le suiga. E alu atu loa le tamaititi e le au maka i luga o le Iunivesite, tifa mai loa faataetaealuga tu i le vaega lea. Ona sau lea i tua, e fiu e fai atu le aoga e na o le basic la le mea la e iloa mai, e aunoa ma se silafia o le tulaga lea sa aoaoina ai, o le le lava o le taimi. E le lava le taimi e aoaoina ai. Ma le isi itu ua laiti faiaoga, e i ai tomai, e aoaoina ai fanau. E foliga mai ua tau sefe le tupe ae faalaititi ai faiaoga e aoaoina ma aotauina fanau a le atunuu. E pe le alagatatau ona toe tuu nisi faiaoga e toatele ai faiaoga aua a toatele faiaoga

e lava le tomai, ona faateleina lea o avanoa e agai i ai alo o le atunuu. Aua ne i o tatou manatu e tuu i tua i galuega a le MCIL ma kamupani e aumai ai tamaiti, e leai faamuamua i, e aumai ai tamaiti e galulue i Matagaluega, aua e tasi lea faafitauli. A le lelei le mafaufau aoaoina o le tamaititi i aoaoga i tulaga tau saogalemu po o le safety, aua o le toatele lava o tamaiti e lavevea mai tua. E lavevea aisea? E le o lava le aoaoina i le taimi lea e aoao ai, e pei o se tulaga lena, aua a faamaoti ese, e manaia foi le faamaoti ese ma le tulaga tau tupe, aua o le vaega lea o lea e noatia ai le aoga faamatata eseese ona ua tasi le Pulega e pulea uma atoa ai.

O sau lea tuualalo ina ia ogatasi e pei ua sili atu aoga ia e i tua a Ekalesia o matata esese ua tuli lava ona o le lelei o pulega ma tuufaatasiga. A o lea e lelei le aoga, ae na o le toe tuualalo lava faalautele atu, ia siisii i luga le tulaga maualuga faamatata eseese sa amata mai i le 1993 seia oo mai i le 2006. O se tuualalo lena i lau afioga i le Minisita, aemaise o le Taitaifono ina ia siilasila mamao ane i ai, faafetai. Ia manuia le fonu.

FOFOGA FETALAI: Malo faafetai i le sui usufono o Salega 1. O lea e matau atu ua tatou taunuu i le tatou taimi malolo, e tusa ma le tatou lafo ua pasia e le tatou Maota, e faaauau galuega i le 2.00. O lea ua tapena le tatou taumafataga o le lunch o le supu povi. O lea la o le a tapena ese fasipovi, ae na o supu fualaau e tali ai la outou sua i lenei aso.

O le a faataatiaese Galuega a le Fonu Aoao e toe feiloai i le itula e 2.00

Na faataatiaese Taualumaga a le Fonu Aoao Faitulafono i le itula e 1:00 i le afiafi seia aulia le itula e 2.00 i le afiafi.